


JOSEPH ME KUTANA

NA BAMPANGI YA YANDI

 ...na ndinga mingi samu na kuzonzila mwa fyoti. Mpe mu vwanda kuzwa mpasi na laka mwa ntangu fioti. Mpe—mpe, na suka yayi, mu kele na miyoyo ya ngolo; ya ke monana mutindu, kaka na konso ntangu mu ke kwisa, na mutindu nionso, mu ke kota kaka na kiwanda yayi. Mazono mu vwandaka tuba na bampangi yankaka ntangu beto vwandaka na zulu ya mwa myongo na New Albany, mpe talaka na yisi mutindu yayi. Mu tubaka, “Ya kele samu na yina, kaka kuna.” Ya kele kaka mwa lubungi na zulu awa, ya ke monana mutindu tasi na zulu ya mbanza nionso. Mpe na ntangu mu ke kuma na kizunga yayi, kaka na ntangu mu ke kota awa, yawu yina, beno me mona, diaka, kaka na ntangu mu ke kota. Oh, mu fwana baka tenta mosi mpe kukwenda na zulu ya mongo, kisika mosi kuna, mpe kuvwanda na tenta. Samu, beto kele kaka bizieti mpe banzena, na mutindu nionso, mutindu yina ve? “Beto ke na kusosa Mbanza yina Mutungi mpe Kiyidiki kele Nzambi.” Ya kele yina beto zola. Ntangu yayi beto kele na ndambu. . .

² Kaka na ntwala ya lukutakanu, na suka yayi, mpe na ntwala ya malongi ya lukolo ya Lumingu, beto kele na mbiekolo ya ba-bébé. Mpe mpangi ya munu ya bakala kele na mwa mosi yina yandi zola kusakumuna na Mfumu; mpangi ya munu ya bakala, na nsuni. Mpe mu banza, bayankaka ya beno bamama mpe batata awa kele na bébé ya fyoti ya kubieka. Ntangu yayi, bambala mingi, na kati ya Biblia. . .

³ Mpe beto me kuzwa bakukabwana mingi na kati ya mabuundu, samu na malongi ya mutindu na mutindu mbotika ya bana, mpe nionso yina. Mpe, ntangu yayi, bayina ke bakaka bawu, mpe ke mwangisa bawu maza samu na mbotika ya bana, yina me tala mutindu nyonso beno zola kubieka bawu. Kasi, kima nyonso ke nata na kima mosi, mbiekolo na Mfumu. Beno me mona? Mpe ntangu yayi. . .

⁴ Samu ti, bébé, samu na disumu, yandi ke na mosi ve. Yesu kufwaka samu na kukatula masumu ya yinza. Mpe bébé me salaka disumu mosi ve, kaka yandi vwandaka. . . Yandi kele nsumuki. Yandi me butuka na disumu. Kasi ntangu Klisto kufwaka na Calvaire, Yandi katulaka masumu ya yinza, mpe bébé kele na kizitu ve tii yandi ke kuma mvula ya luzabu. Mpe bébé nyonso ya fyoti, ata mutindu nsumuki bibuti kele, ntangu yandi ke kufwa, yandi ke kwenda mbala mosi na maboko ya Klisto, beno me mona, samu ti Yandi futaka ntalu. Ata ti kana ya

kele bebe yina me butuka na disumu, mpe na nzila ya kindumba to nyonso yina ya kele, ya ke sala ata luswaswanu ve, bébé yina kele na lukengolo na Klisto samu Yandi kufwaka samu na kukatula masumu ya yinza. Mpe ntangu—ntangu yandi ke kuma mbuta mingi ntangu yayi, ti yandi me sala disumu ya yandi mosi, na yina yandi fwana kubalula ntima samu na yina yandi me sala. Kasi ya ke na disumu mosi ve tii yandi ke kuma mbuta mingi samu na kusala disumu, samu na kuzaba yina kele mbote mpe yimbi. Kasi, ntangu yayi, beto ke mekaka ntangu nyonso na kubikana pene-pene ya Biblia na zulu ya bima yayi, mutindu beto zaba.

⁵ Ntangu yayi, ya kele ve na Masonuku na kati ya Biblia, samu na kumwangisa maza na ba-bébé. Kima kaka yina beto ke mona . . . To, ya kele ve na mbotika ya bana na kati ya Biblia, na mutindu mosi ve. Kisika kaka beto lenda mona, yina kele ya kusonika awa na kati ya Masonuku, ti Ye- . . . “Ba nataka bana ya fioti na Yesu, mpe Yandi bakaka bawu na maboko ya Yandi mpe sakumunaka bawu, mpe tubaka, ‘Benó bika bana kukwiza na Munu, mpe beno pekisa bawu ve, samu ti mutindu yina kele Kimfumu ya Mazulu.”

⁶ Ntangu yayi, ti, ntangu yayi, mutindu Yandi me kwenda na Nzambi, mpe me vwanda na diboko ya kibakala, bubu yayi, na nzutu ya Yandi ya nsuni, mpe na zulu ya Kiti ya kimfumu ya Nzambi, mpe Yandi me tuma Dibuundu ya Yandi na kukwenda na yinza ya muvimba mpe samu na kulandila bisalu yina Yandi bandaka awa ntangu Yandi vwandaka awa na zulu ya ntoto, ya kele, kulonga Nsangu ya mbote, kubelusa bambevo, mpe kubieka bana, mpe nyonso yina, na yawu ba me lomba na bankundi ya luzolo na kunata bana ya bawu ya fyoti na Mfumu, na kupesaka bawu na pasteur ya bawu, na maboko ya yandi, mpe yandi ke zangula bawu, na lukwikilu, na Klisto, mpe ke lomba Klisto na kusakumuna bawu.

⁷ Mpe, na yawu, kana beno kele na mwana yina—yina beno me bieka ve na Mfumu, mpe beno zola kunata yandi na yina mpangi ya beto ya kento ke bula piano, *Benó Nata Bawu Na Kati*, mpe beto lenda yimba yawu. Bantu yikwa zaba nkunga ya ntama, *Benó Nata Bawu Na Kati?* Mpe ya kele mbote. Ntangu yayi, Tata mpe Mama Henry Branham ke nata bébé ya bawu. Mpe bayankaka nionso yina kele na bana yina bawu zola kunata, mbote, beno nata kaka bawu na ntangu yayi samu na mbyekolo. Mbote mingi.

Benó nata bawu na kati, beno nata bawu na
kati,
Benó nata bawu na kati na ngaanda ya bilanga
ya disumu;
Benó nata bawu na kati, beno nata bawu na
kati, (. . . ? . . .)

⁸ Mu zola talisa na beno Branham yankaka ya ntwenia, Mary Ella Branham. Ya kele mwana ya kento ya mpangi ya munu ya bakala mpe kento ya yandi ya luzolo. Ti, ba me kwisa na suka yayi, na ntwala ya yinzo-Nzambi, samu na kubieka, luzingu ya mwana yayi ya bakala, na Nzambi, Yina pesaka yandi na bawu.

Ntangu yayi beto kulumusa bayintu ya beto na mwa ntangu fioti.

⁹ Tata ya beto ya Mazulu, mutindu me telama awa na ntwala ya munu bubu yayi, mpangi ya munu mosi ya bakala na nsuni, mpe kento ya yandi ya makwela, kento ya yandi. Mpe Nge me sakumuna yinzo ya bawu na bébé yayi Mary Ella, samu na kupesa bawu kyese na bilumbu yina kele na ntwala ya bawu. Mu ke tonda Nge samu na kubambuka moyo ya bawu na kisika bébé me katuka, mpe kunata yandi bubu yayi na dibuundu, ti ba lendaka vutula yandi na Nge. Mpe mu ke pesa ntangu yayi bébé yango na Nge, na maboko ya lukwikilu, mpe mu ke lomba na Nge na kusakumuna bébé yango ya fioti yina mu me simba. Mpe ti yandi zinga mpe kukula. Mpe kana Yesu vutuka nswalu ve, ti yandi vwanda kisadi ya Nge, samu na kusadila Nge.

¹⁰ Sakumuna tata mpe mama ya yandi. Mpe, Nzambi, sala ti Mpeve-Santu ya Nge kutwadisa bawu na nzietolo ya luzingu ya bawu. Mpe na kilumbu mosi, ntangu nzietolo yayi ya ntoto ke suka, ti dibuta nyonso ya nene ke kuvukana kintwadi na Nkembo. Pesa yawu, Mfumu. Tii ntangu yina, bika ti mwana kukula mpe yandi kuzwa lusakumunu ya Nzambi, yandi vwanda na mavimpi ya mbote mpe na ngolo, mpe yandi vwanda mbandu ya bukeno na bilumbu ya yandi ke kwisa. Mpe beto ke pesa Nge lukumu. Samu ti beto me pesa bébé yango na Nge ntangu yayi, na Nkumbu ya Yesu Klisto, Mwana ya Nge. Amen.

¹¹ Mpe mu ke vutula yandi na beno. Nzambi sakumuna beno. Mfumu sakumuna beno. Mbote mingi.

Balubambuku ya ntalu, wapi mutindu ya ke wumelaka,
Yina ba me fidisa kisika mosi na moyo ya munu;
Mutindu yawu ke wumelaka, ntangu nionso pene-pene ya munu,
Mambu ya ntalu, ya busantu ke monana.

¹² Mutindu beto ke kembila Mfumu ya beto ya luzolo samu na bana nyonso ya fyoti! Beno zaba, ya ke monana kaka ya ngitukulu mutindu beto vwandaka kaka bana ya fioti mutindu yina. Mpe ya kele na kima mosi samu na bébé yina kele na zola, yina ke lemvo kilaka mingi mpe ke na lutondo mingi. Mpe Mfumu ya beto fwanikisaka bawu, mpe tubaka, “Kana ti beno balula ntima mpe beno vwanda mutindu mosi ya bana yayi ya fioti,” na malembe nionso.

¹³ Mu ke tala mwana ya munu ya fioti Joseph, mutindu yandi kele kaka mvula ya kuvwanda bisika nyonso, mpe mama fwana sungika yandi. Mpe yandi ke katula mwinda, to nyonso yankaka, ke panza yawu na ntoto. Mpe na yina kana mama me bula yandi fimbu, to kima mosi, yandi ke mata na maboko ya yandi mpe ke tula maboko ya yandi pene-pene ya yandi mutindu yayi.

¹⁴ Beto fwana lemvo-kila, mosi na yankaka, mutindu bana yayi ya fioti, samu na kukota na Kimfumu.

¹⁵ Ntangu yayi, beto ke vutula matondo na Nzambi samu na bébé yayi ya fioti, Mary Ella Branham. Mpe bika ti yandi kuzinga, mpe kukula mpe kutoma, mpe kuvwanda kisadi ya Mfumu. Mpe bika ti yinzo yina yandi ke na kukula kuvwanda yinzo ya Baklisto, mpe na yina ya lendaka sepelisa Klisto.

¹⁶ Mpe ntangu yayi beto kele. . . (Matondo na nge, Mpangikento Gertie.) Mpe ntangu yayi bana ya fioti me baka kisika ya bawu na kati ya kivinga samu na bakalasi ya lukolo ya Lumingu.

¹⁷ Mpe pasteur me—me pesa mazabusu ya kisika balukutakanu ke vwanda bubu yayi, mpe mbasi, mbasi na nkokila. Na manima ya midi yayi, bawu ke. . . mutindu mu zaba, ya kele ve na balukutakanu ya pwelele, kasi ya ke vwanda na bamission yankaka na Louisville, yina beto me zaba, Mpangi ya beto Durban mpe mingi ya bawu. Mu banza ti bawu kele na lukutakanu ya Lumingu na manima ya midi.

¹⁸ Mu kele na bambokolo mingi. Bantu mingi kele na bayinzo ya lusambusu, mpe nyonso yina, samu ba sambila samu na bawu, yina kele ya kubela mpe bantu ya mpasi.

¹⁹ Balukutakanu ya munu yina ke landa ke vwanda na Cleveland, na Tennessee, na mbandukulu ya Kilumbu ya tanu na nkokila, na Kilumbu ya tanu na Lumingu.

²⁰ Mpe na yina beto ke vutuka na yinzo, mpe beto ke kwenda na South Bend, na Indiana, mpe samu na bankokila zole kuna na mbiekolo ya tempelo; Mpangi R. E. S. Toms ya Saskatoon, na Saskatchewan.

²¹ Mpe na yina, katuka kuna, beto ke kwenda na Sturgis, na Michigan, samu na bankokila zole ya kisalu na Sturgis, na Michigan.

²² Mpe na manima beno ke kwenda na Lima, na Ohio, na bantu ya Baptiste, na Memorial Auditorium na—na Lima, na Ohio. Yina ke banda na kilumbu ya makumi zole na tatu ya Ngonda ya ntete, tii na kilumbu ya makumi zole na sambwadi.

²³ Mpe na manima, katuka kuna, beto ke kwenda kuna na Côte Ouest, na balukutakanu ya nene na Californie na Arizona. Beno wanda na bisambu samu na beto. Mbasi. . .

²⁴ Na nkokila yayi, na ngunga ya sambwadi na ndambu, ya ke vwanda na balukutakanu ya kumwangisa nsangu awa na tabernacle, mpe ba me bokila muntu nyonso.

25 Mpe mbasi na nkokila, mu fwana . . . Mu ke tuba samu na Mpangi Cauble, na lukutakanu ya yandi—ya yandi ya kati-kati ya mpimpa. Mu ke vwanda . . . Kitini ya munu ke banda na ngunga ya yivwa, tii pene ya ngunga ya yivwa na ndambu.

26 Na yina mu ke vutuka na tabernacle awa, kisika lukutakanu ke kwenda ntete na kulandila, na ba-pasteur ya banzenza mpe balongi yina ke vwanda awa, samu na kuzwa ndambu na lukutakanu ya mbasi na nkokila. Kana beno nyonso zola kuwa ba-pasteur kuzonza mpe kutalisa mitindu ya bawu ya kutuba na beno mutindu ya kubanda mvula ya malu-malu, mpe yinki kusala, mbote, na bidimbu ya Masonuku, na yina, beno vwanda awa mbasi na nkokila. Balukutakanu ke banda na ngunga ya sambwadi na ndambu, mutindu na mumesanu, na ngunga ya sambwadi na ndambu. Mpe ke landila tii na kati-kati ya mpimpa, na Lumingu na nkokila, mpe na manima . . . to, na Kilumbu ya ntete na nkokila, mu zola tuba. Na yina, na manima ya ngunga ya yivwa, na manima mu me manisa na Mpangi Cauble, mu ke vutuka kaka awa na tabernacle, na kubanda, mpe mu banza, mu banza, samu na kumanisa dilongi yina mu zola kubanda na suka yayi. To, mu kele . . . mutindu ya ke baka munu ntangu ya yinda.

27 Mu ke malembe, beno zaba, kasi mu zola ti Yawu kulumuka mbote mutindu fondasio. Na yina, ya kele ve na nsatu ya kumwangisa Yawu bisika nionso. Mu ke zola ti Yawu kuvwanda kuna, mpe kukula mpe kukwenda na ntwala samu na Mfumu.

28 Ntangu yayi, ya kele na longi mosi awa na suka yayi, longi mosi ya ntwenia yina fwana vwanda, mu banza, na Bel Air Motel. Mu banza ti mu me mona yandi pene ya ngunga ya ntete na minuti makumi sambwadi, na manima ya midi yayi. Mpe, to, yandi kele na kati, dyaka? Na yina, mu me zimbana nkumbu ya mpangi-bakala. Yandi me katuka na Tennessee. Yandi belukaka na mukongo ya kubukana, na lukutakanu ya munu, mpe kotaka na ministele. Mpangi yayi ya bakala, *kuna*. Mbote mingi. Ya kele mbote. Ya kele na . . . Ya kele na . . . Ya vwandaka na ngunga ya ntete na minuti makumi tanu na sambwadi, mutindu yina? Mu . . . [Mpangi-bakala me tuba, “Tatu.”—Mu.] Tatu; tatu na yiya. Mbote mingi.

29 Mpe dyaka ya kele na mulongi yankaka, mu zaba ve kana yandi kele awa to ve. Yandi me katuka kuna na Colombie-Britannique du Nord. Kilumbu mosi, ntangu mu vwandaka meka na kukanga mwa ba-sakosi, na zulu ya bampunda, mu banza, to kima mosi; Mu vwandaka na mandefu ya yinda mutindu *yayi*, mu vwandaka me vutuka na nzietolo ya kuzomba; bamvula mingi me luta. Bakala mosi kwisaka mpe tubaka, “Nge kele ve Mpangi Branham?”

30 Mu kutanaka na mama mosi ya ntwenia na magazini, yandi tubaka ti yandi me monaka ata fioti ve ken- . . . to—me monaka

ata fioti ve mbanza, mbanza ya nene. Mpe mu banza ti yandi vwandaka na bitamina ya ba-kilometre nkama sambanu to nana na kati ya mbanza mosi, mbala yankaka kulutila yina, bankama ya ba-kilometre na bala-bala ya nene, na mwa mbanza yina ba ke bokilaka East Pines. Mu banza ti ya kele na magazini mosi kuna. Kuna na manima, bankwelani yandi kwizaka kuna.

³¹ Mpe bawu ke na kwenda na Cuba. Mu ke kukiyufula kana bawu kele awa na suka yayi, yinga, na node ya Colombie-Britannique? Kaka *awa*. Mbote, ntima ya nge kusakumuka, mpangi-bakala. Beto ke na kiese na kuvwanda na nge mpe kento ya nge, ba-missionaire, beno ke sala nzietolo. Ba me bokila munu, na suka yayi, mutindu—na Star Motel. Mfumu sakumuna beno. Mu zaba ti bampangi ya beto nyonso ke vwanda na kyese na kupesana mbote na bawu. Mpe muntu yina, na nzila ya foto, lendaka zaba munu na mandefo yina nionso, kele na kutala ya mbote. Ya kele mbote mingi.

³² Mpe bawu vwandaka na ngolo mingi, kuna na zulu kisika ya kele na bantu ve, na mpasi, kuna na East Pines. Mpe ya ke vwanda, mpasi na kutuba wapi mutindu bantu fioti kele na kati ya yinsi yina, kasi, na yina, ba vwandaka kuna mutindu ba-missionaire, ba vwandaka meka na kusala kima mosi samu na nkembo ya Nzambi. Ya kieleka mu ke sepelaka na bawu na ntima ya munu ya muvimba. Mu zaba ti beno nionso ke zola kupesana mbote na bawu mpe kuwa samu na yinsi ya nene ya bantu ya wesete. Mpe, ntangu yayi, na yina . . .

³³ Mu ke kwikila ti mama ya Mama Roberson kele dyaka ya kubela mingi. Mu fwana mona yandi na manima ya midi yayi, mpe kubambuka moyo na kusambila samu na yandi. Ya ke vwanda . . . Mpe na yina, kana Mfumu kuzola, mu ke vutuka diaka awa na ngunga ya sambwadi na ndambu na nkokila yayi. Mu banza ti McSpaddin ke kuna na manima, mutindu beto ke kwenda na madia ya midi na bawu pene-pene ya ngunga sambanu, mpe ya pesa beto ntangu ya kuvutuka.

³⁴ Mpe na yina beto zola kutala Mama Burns. Mpangi Burns kele awa, na suka yayi? Yandi kele awa? Yinga. Mu monaka nge ve, Mpangi Burns, yina me vwanda. Mpangi-kento Burns kele ya kubela mingi, ya kubela mingi.

³⁵ Mpe mu vwandaka na nkokila yankaka yina, samu na kutala yandi, mpe yandi kele kieleka ya kubela. Mpe moyo ya kikesa yandi kele. Mpe beto zola muntu nyonso ntangu nyonso kukangama na Nzambi, samu ti, ya kele mutindu yayi, na kuzabaka ve nani ke vwanda awa; kasi ya ke lomba kimangu ya Nzambi na kuvutula Mpangi-kento Burns na dibuundu dyaka. Ya kele kieleka.

³⁶ Ntangu, bakala ya yandi ya luzolo basikaka na lupitalu kuna, na Lupitalu ya ba-Vétérans, na cancer, ya kufundisa na kufwa, mpe Nzambi belusaka yandi. Mpe awa yandi kele, na

manima na kati ya dibuundu, mpe na mavimpi ya mbote dyaka yina lendaka vwanda na ntangu yayi. Mpe ntangu Mfumu belusaka yandi na rate ya nene ya kuvimba, na cancer na kati ya yawu, kima mutindu mosi, bamvula mpe bamvula me luta.

³⁷ Mpe mu ke bambuka moyo na ntangu yango, ntangu Mpangi Wood vwandaka kuna. Mu vwandaka na mwa konze. Beto vwandaka kuna na mfinda, na kuzomba bampadi, mpe Kima mosi tubaka na munu, “Vutuka na yinzo.” Mu vutukaka na yinzo. Mpe na yina mu zolaka kwenda na Louisville, mu ke zaba ata fioti ve. Mpe Mpangi Wood, me kukula pene-pene ya Louisville, na kunataka block ya yimbi, ya vwandaka baluka, baluka, baluka, na kumekaka na kuzangula munu. Mpe Nzambi vwandaka simba munu na nsongi mosi, ke vingila Mpangi-kento Burns kukwisa tuba na munu. Mpe ya vwandaka yandi, kento yina ya kikesa, yina kwisaka tuba na munu ti bakala ya yandi vwandaka kufwa kuna na lupitalu, ntangu beto kwendaka kuna mpe beto sambilaka.

³⁸ Mpe yandi fukamaka, mpe bakaka foto yina, yina Mfumu bakaka foto ya Yandi, Dikunzi ya Tiya...Beno nionso me monaka yawu, mu banza. Yandi tulaka yawu na ntoto. Mpe yandi tubaka, “Nzambi ya luzolo ya Mazulu,” yandi tubaka, “sadisa munu na kuzwa Mpangi Branham mbala mosi. Mu fwana sala yawu.” Mpe yandi tubaka, “Wanzio ya Nzambi, twadisa munu na yandi.” Yawu yina ya ke lomba. Mpe yandi telamaka, mpe kwendaka na mbanza, samu na kufuta facture ya lotiliki, mpe yandi twadisamaka na ngitukulu na nsongi yankaka. Mpe Nzambi fidisaka munu na mfinda, na Louisville, mpe me telemisaka munu na nsongi na kati-kati ya ngunga, na kutalaka Mpangi Wood ke baluka na nsongi ya yimbi ntangu nyonso kuna, na kumekaka na kuzangula munu, yandi vwandaka kuna. Beno me mona?

³⁹ Ntangu yayi, beto zaba ti Nzambi zaba kisika mwana ya Yandi ya kento kele ya kuvwanda kuna, mpe Yandi ke vingila ti beno sambila kisambu ya lukwikilu. Beto ke sala nionso beto lenda sala.

⁴⁰ Kima yankaka beto zola tuba na suka yayi, kaka na bayintu ya kukulumusa ve, kasi bantima, na mosi ya bantu ya kukwikama yina mu...mosi ya bawu, yina mu me kutanaka ntete ve na luzingu ya munu, ya kele Mpangi ya beto Higginbotham. Yandi...Mpangi ya beto ya kento ya luzolo me kwenda vwanda na Mfumu Yesu. Soda ya kikesa ya Nzambi; bambala yikwa mu me monaka yandi kukwiza na autel! Nsatu ya yandi vwandaka, ntangu nyonso, kukwisa na ndonga ya bisambu yayi, kisika Mpeve-Santu zolaka tuba na yandi yinki vwandaka dyambu. Yandi vwandaka zola kusala yawu. Mpe bambala yikwa yandi me kwisaka na estrade yayi awa, na kumekaka na kutala kana kuswasikisa mabanza ke—ke kwiza. Mpe na balukutakanu

yankaka mpe bisika ya mutindu na mutindu yandi mekaka, kasi ya ke kwisaka kaka ve, na mutindu nionso.

⁴¹ Mpe na yina, mwa basabala fioti me luta, ntangu mu vwandaka kwenda na lupitalu, ntangu mu kuwaka ti yandi vwandaka ya kubela, mpe ntangu lutaka na nkokila. Mpe ntangu mu kwendaka na lupitalu mpe mu vwandaka na lweka ya yandi, kuna Mpeve-Santu kulumukaka; mpe vutukaka na luzingu ya yandi mpe basisaka nyonso, mpe tulaka yawu kaka kieleka kisika mpasi vwandaka. Kasi, kima ya ngitukulu vwandaka, Mpangi-kento Higginbotham vwandaka ve na nsatu ya kuvwanda awa ntangu ya yinda. Yandi zolaka kukwenda. Ya vwandaka na Kima mosi vwandaka bokila yandi. Yandi vutulaka mvutu na mbokolo yina kilumbu yankaka yina samu na kukwenda vwanda na Nzambi. Mpe mu ke bambuka moyo na yawu ntangu nionso. Yinga. [Kisika ya mpamba na bande—Mu.]

⁴² Kuyituka ve ti beno ke kuwa yimbi ntangu beno ke kota na kati ya mbanza; ba ke manga Nsangu ya mbote. Yawu yina diambu. Mpe yandi me fundisama. Kufulukuka ya masa ya 1937 ke vwanda na kima mosi ve, tii yayi ke suka. Kasi, yinga, ya kele ya kufundisa, ya kieleka. Mpe ya kele samu na yina bisono kele na zulu ya kibaka.

⁴³ Mpe, ntangu yayi, ya kele yimbi mingi. Mpe beto kele na kimvwama, bima yina kele awa, kasi mu kuwaka kilumbu yankaka yina ti bampangi ya beto kele na ticket samu na kutula ditoma na lweka ya lupangu ya dibuundu kuna. Nsoni ya mutindu yina! Mu ke futa ticket yina kana beno ke zabisa munu yinki ya kele. Ya ke kyadi. Yinga, tata. Mbote, beto, yayi, mu banza kana. . . Mu banza ti beto kele dyaka na yawu. Na kutala, mukanda ya muswa me tuba mutindu yina. Beno kwenda kaka na lweka yayi awa, mpe ya lendaka vwanda ti beno ke kuzwa ve tike na lweka kuna. Kasi mu ke na kiese ti beto ke na kukwenda na kisika yina ba ke lombaka ve ba-ticket. Mutindu yina ve? Ya kele kieleka. Mbote. Yinga, ya kieleka. Ntangu yayi, mu kele ve. . .

⁴⁴ Mu ke meka kaka na kutuba mwa ntangu fyoti, na suka yayi, samu ti mu kuzwaka na miyoyo ya kieleka ya yintu, mpe mu telamaka. Mpe—mpe mu zola kubaka dilongi na Ngwisani ya Ntama, mpe kulonga kaka mwa ntangu fyoti, kana Mfumu zola. Mpe kuna mu banza, na nkokila yayi, kana beto vutuka, kana Mfumu zola, beto ke vutuka na ntangu ya mbote, mpe ya kulemba mingi ve.

⁴⁵ Oh, mu banza kaka, diaka. Mpangi Kelly kele ya kuvwanda awa, mpe Mpangi-kento Kelly, ke kwisa, mbala mosi na. . . Nge ke kwisa na nswalu nionso, na manima ya madia ya midi, samu ti kieleka mu me basika na manima ya midi yayi, na bima mingi, Mpangi Kelly. Mu ke bambuka moyo na nkokila yina, kuna, mu vwandaka me manisa mbokolo ya allo-allo ntangu beno nionso

me kota. Mbote mingi. [Mpangi mosi ya kento me tuba, “Nge zola kwiza, Mpangi Branham?”—Mu.] Ntangu yayi, ya kele—ya kele nyonso ya kulunga, mpangi ya kento.

⁴⁶ Ntangu yayi, na yina, beno sambila samu na munu, mpe beno sambila samu na . . . balukanu ya munu, samu na Mfumu, ke vwanda—ke vwanda samu na Yandi, ya kulutila yina mu lenda sala.

⁴⁷ Ntangu yayi, beto zola kubaka Buku ya ntama, ya ntama, ya nsuka . . . Buku ya ntete, Genèse 35, mpe beto zola tanga kaka mwa kitini ya Masonuku awa na Buku ya Genèse. Mpe beto ke sambila ti Nzambi kubwela balusakumunu ya Yandi mutindu lufulu na zulu ya kima yina beto zola kulonga.

⁴⁸ Mpe bantu yikwa ke zolaka lukolo ya Lumingu? Oh, ya kele. . . Bantu yikwa zaba kisika yawu bandaka ntete? Mu ke mona diboko ve. Ya kele mutindu . . . Bantu yikwa zaba yina ba vwanda bokila yawu ntete? Wapi kento ya munu kele? Yandi fwana zaba yawu. Mbote mingi. Ya vwandaka . . .

⁴⁹ [Mpangi Neville me tuba, “Mpangi Branham?”—Mu.] Yinga? [“Mission- . . . Missionaire yankaka awa na suka yayi.”] Missionaire yankaka. Nzambi sakumuna nge. [“Mpangi Naber.”] Mpangi-bakala nani? [“Mpangi Naber.”] Mpangi Naber, wapi kisika yandi kele? Nge zola kutelemisa diboko ya nge, Mpangi Naber? Nzambi sakumuna nge, mpangi-bakala. Ya kele kento ya nge na nge? Ya kele kieleka mbote. Beto kele na kyese na kuzwa nge mpe dibuta ya nge na beto na suka yayi. Nge zaba ti nge kele na luzolo ya Nzambi. Nge me mona? Beno fwana vwanda, ntangu beno kele missionaire, beno me mona. Samu, bantumunu ya ngudi kele, “Beno kwenda na yinza ya muvimba mpe beno longa Nsangu ya mbote na bantu nionso.”

⁵⁰ Muntu yina kele missionaire! Ntangu yayi, mu ke kipe ve—mu ke kipe mingi ve. . . *Missionaire* kele mpova mosi ya mbote mingi, kasi mu kele na mpova ya mbote mingi samu na yawu. Beno kele ntumwa. Beno me mona? Ya kele kieleka. Ntangu yayi, yinki zola kutuba mpova *ntumwa*? “Muntu yina ba me fidisa.” Yinki zola kutuba mpova *missionaire*? “Muntu yina ba me fidisa.” Ya kele kima mosi. Na yawu, ba-missionaire, baprofete, ba-evangeliste, milongisi, mpe bapasteur, ke sungikaka Dibuundu. Ya kele kieleka? Bantumwa, baprofete . . . ba ke bokilaka bawu. Na yawu, ntangu nyonso yina beno kele missionaire, to ntumwa, beno kele mosi yina ba me fidisa na Nzambi, na kusalu, mpe beno kele ntangu nyonso ya kusungama. Nzambi sakumuna nge, ya kele kisambu ya munu—ya munu.

⁵¹ Mpangi-bakala mpe Mpangi-kento Foss ke na kukwendaka na Cuba, na bamfinda. Ba ke na kwenda na kizunga ya madidi ya node, tii na bamfinda ya nene ya sude, samu ti Nsangu ya

mbote yayi fwana longama na yinza ya muvimba. Amen. Wapi nsobolo!

⁵² Wapi kisika nge me katuka, mpangi-bakala? [Mpangi-bakala me tuba, “Mu ke kwenda na Israel ntangu yayi, mpangi-bakala.”—Mu.] Ya ke kwenda na Israel.

⁵³ Oh, mu ke zola . . . Mu ke mona Mabel kele ya kuvwanda na manima kuna, mu ke bokila kento ya munu mpe Mabel, samu na kuyimbila beno:

Ba me katuka na Este mpe na Weste,
Bawu katukaka na ntoto ya ntama,
Samu na kusala feti na Ntinu, samu na kudya
mutindu banzenza ya Yandi;
Mutindu kele ya kusakumuna bizyeti yayi!
Na kutalaka kizizi ya Yandi ya santu,
Kulezima na nsemo ya Kinzambi;
Bayina ke vwanda ya kusakumuna na lemvo ya
Yandi,
Mutindu misanga na yimpu ya Yandi ke lezima.

⁵⁴ Ya ke vwanda mbote ve na kilumbu yina! Amen. Mfumu sakumuna nge, na Israël; mpe nge, na kisika nge ke na kukwenda; ya kele balusakumunu ya munu samu na beno bampangi na suka yayi. Amen.

⁵⁵ Ntangu yayi, ntete beto zibula Biblia . . . Beto zaba ti yayi kele masonuku, mpe Nzambi kele na dilongi ya kusonika na kati-kati ya banzila, beno me mona. Na yina, beto lenda tanga masonuku mpe beto bika Nzambi kupesa beto dilongi. Na yina beto kulumusa bayintu ya beto na mwa ntangu fioti, samu na kisambu.

⁵⁶ Tata ya beto ya Mazulu, na Nkumbu ya Mfumu Yesu, beto ke sambila ti Nge ke baka Bandinga yayi beto ke tanga ntangu yayi, mpe ke buka Yawu kaka na kati ya bantima ya beto. Mpe beto ke kwisa na lembami, na pima nionso, na kukikulumusisa nionso, na luzitu nionso, na Mvwandulu ya Nge. Mpe ti Mpeve-Santu kubaka Ndinga ya Nzambi mpe kudisa konso ntima. Kintwadi na ntima ya munu, Nge zola, Mfumu? Samu ti mu me lomba yawu na Nkumbu ya Klisto. Amen.

⁵⁷ Mbote mingi, beto ke tanga kaka nzila mosi to zole, awa, samu ti beto kuzwa kaka mwa dibanza. Genèse kele kapu ya nkuna, beto zaba. Mbote mingi. Beto ke banda na nzila ya 15.

Mpe muntu mosi monaka yandi, . . . tala, yandi vwandaka yenga-yenga na kilanga: mpe bakala yufulaka yandi, na kutubaka, Yinki nge ke sosa?

Mpe yandi tubaka, mu ke sosa bampangi ya munu: tuba na munu, mu ke lomba na nge, . . . bawu ke disaka mameme ya bawu.

Mpe muntu yango—mpe muntu yango tubaka, Bawu me kwenda ntama; samu ti mu kuwaka bawu kutuba, Beto kwenda na Dothan. Mpe Joseph landaka bampangi ya yandi, mpe yandi monaka bawu na Dothan.

Mpe ntangu bawu monaka yandi ntama kuna, mpe ntete yandi kwiza pene-pene ya bawu, pene-pene ya yawu. . . yandi samu na kufwa yandi.

Mpe ba tubaka mosi na yankaka, Tala, muntu ya bandosi yayi ke na kwisa.

58 Mpe bika ti Mfumu kupesa balusakumunu ya Yandi na Ndinga ya Yandi. Ntangu yayi, Genèse kele ntangu nionso, samu na munu. . .

59 Mu tubaka na beno yina kapu yayi vwandaka? Ya kele Genèse. Mu ke kwikila, kana mu me mona, na Genèse 37, mpe kubanda na nzila ya 15, mpe beno ke baka kidimbu yina. Ntangu yayi beto. . . Mu banza ti mu tubaka na 35, na mwa ntangu fioti me luta. Mu vwandaka na ba-page zole kintwadi. Beno lemvokila munu—beno lemvokila munu. Mwa Biblia yayi ya ntama ya Scofield, mpe ya kele mutindu mpasi samu na munu na kutanga, samu ti mu me luta bamvula makumi yiya, beno zaba. Mpe munu. . .

60 Ba ke tuba na munu ti mu lendaka vwanda na maneti ya kutangila. Mu kwendaka mpe salaka kizame ya meso ya munu, ntangu mu kwendaka kuna mu zolaka pusa Biblia ya munu ntama na munu. Mpe dokotolo me tuba na munu ti diboko ya munu ke vwanda dyaka ntangu ya yinda ve, na manima ya mwa ntangu fyoti, samu na kuvutula yawu. Mpe mu fwana. . . Yandi tubaka ti mu kele na mfunu ya maneti ya kutangila. Mu sakaka kizame ya meso ya munu, mpe ba talaka yawu ya kulunga, kumi-kumi. Kasi mu lendaka mona nsuki na zulu ya ntoto, kisika mosi kuna, kukondwa mpasi. Kasi beno tula yawu pene-pene ya munu. . . Yandi tubaka, “Ntangu nge ke. . .” Yandi tubaka, “Yinki ke sala ti bansuki ya nge kukuma mpembe?”

Mu tubaka, “Mu zaba ve.”

61 Yandi tubaka, “Ya kele buboba.” Ha-ha-ha! Yandi tubaka, “Ya kele yina ke salaka yimbi na meso ya muntu ntangu beno ke luta bamvula makumi yiya. Beno, kieleka, ba-globe ya meso ya beno ke fiotuka. Mpe beno fwana kaka ku—kutambula na yawu, kaka yina.” Mpe mu ke landila kaka na kuvutula yawu. Mpe, mbote, mu kele na ntangu ve ya kukwenda, kasi mu—mu ke kuzwa kilumbu mosi, mpe mu ke kuzwa kutanga samu na kutanga na yawu, ntangu mu ke longi mingi. Kasi ntangu yayi mu me tanga kaka dilongi mosi mpe mu ke kwenda na ntwala. Mpe yayi kele. . . Mu me kuzwa Biblia yayi bamvula mingi me luta, mpe ya kele kieleka, na bisono ya nene.

62 Ntangu yayi, na Genèse, *Genèse* zola kutuba “mbandukulu,” kapu ya nkuna. Mpe beno bambuka moyo, ti, nyonso yina

kele bubu yayi, kieleka bandaka na Genèse. Ya vwandaka mbandukulu ya bima nyonso. Ya vwandaka mbandukulu ya—ya mpulusu. Ya vwandaka mbandukulu ya disumu. Ya vwandaka mbandukulu ya kusambila nyonso. Ya vwandaka mbandukulu ya Dibuundu ya kieleka. Ya vwandaka mbandukulu ya dibuundu ya luvunu. Ya vwandaka mbandukulu ya ludedomo. Ya vwandaka mbandukulu ya luvunu. Ya vwandaka mbandukulu ya bima nyonso, yina bandaka na Genèse.

⁶³ Mu zola ti beto vwanda kaka na bangonda tatu na zulu ya yayi, samu na kuvwanda kaka na zulu ya dilongi yayi, mpe kutimuna yawu, kukanga yawu na nzila ya Mpeve-Santu, na bansinga ya Nzambi, mpe beno kufika yawu kaka kintwadi. Mpe beno tala mbote mutindu konso Ndinga ke vukana kaka na Bandinga yankaka. Kima mosi ya kitoko mingi!

⁶⁴ Ndinga ya Nzambi kele kieleka ya kutwadisama na kimpeve! Ata yinki nsungi, na konso muntu yina me tangaka ntete Masonuku yayi, na nzila . . . Ba me sonika yawu ntangu yayi bankama mingi, yinga, pene-pene ya mafunda tatu, kulutila, bamvula. Mpe muntu nyonso yina me tangaka ntete Masonuku yayi, na konso nsungi, kele ya kutwadisama na Yawu, beno me mona, nzila nyonso ya Masonuku. Ya kele na kima yankaka ve yina lenda baka kisika ya Yawu.

⁶⁵ Bisono yina ba sonikaka na kilumbu yankaka, ntangu ba me tanga yawu samu na nsungi yina mpe samu na lukanu ya yawu, ya me kubama. Mu lenda sonikila beno mukanda, mpe kutuba, “Mpangi ya munu ya luzolo, bubu yayi mu me kuma na kisika yayi mpe me sala yayi-mpe-yayi, na ntangu mosi.” Yina ke kwenda mbala mosi na beno, mpe yina ke sukisa yawu. Mbala yankaka samu na nzikisa ya lusambusa to kima mosi, ya lendaka vwanda samu na nzikisa yina ke telemina munu to samu na munu, samu na kusiamisa munu kima, to kusiamisa kima na zulu ya munu, kasi ya ke vwanda ve nsangu ya kieleka mutindu ya ke vwanda ntangu ya ke pesama na beno.

⁶⁶ Kasi Biblia kele mutindu yina ve. Ya me pesama na bantu, mpe samu na bantangu nionso mpe samu na bansungi nionso, samu Yawu kele Ndinga ya Nzambi yina me sonama. Beno me mona? Bandinga ya Yandi lenda kubwa ata fioti ve. Yawu ke kufwa ata mbala mosi ve, mpe ntangu nyonso yina ya kele na Seko, ntangu nyonso mpe ntangu nyonso, bayayi ke vwanda dyaka na bantendulu ya mutindu mosi, samu ti Yawu mbala mosi me katuka na bikoba ya Nzambi. Beno me mona? Ya lenda kubwa ve! Beno banza kaka na yawu, mutindu Ndinga ya Kukonda nsuka ya Nzambi kele. Yawu kele Luzingu.

⁶⁷ Ntangu yayi, yinki kele ndinga? Ndinga kele dibanza yina me tubama. Mpe ntangu Nzambi mbala mosi ke banzaka kima mosi, ya kele kaka dibanza. Kasi ntangu ba me tuba yawu mbala

mosi, ya lenda beba ata fioti ve to kusoba. Ya fwana vwanda kaka kukonda nsuka.

⁶⁸ Samu ti, ndinga ya beno kele kaka mbote mutindu beno kele. Ndinga ya Nzambi kele mbote mutindu Yandi kele. Ndinga ya beno kele kitini ya beno. Nsilulu ya beno kele kaka mbote mutindu beno lenda vwanda. Mpe nsilulu ya Nzambi kele kaka mbote mutindu Yandi lenda vwanda.

⁶⁹ Ntangu yayi, mutindu muntu yina ke kufwa, beno lenda sala nsilulu mpe kuluta yawu, samu ti beno kele kaka muntu yina ke kufwa. Mu kele kaka muntu yina ke kufwa. Kasi, Nzambi, na kuvwandaka yina ke kufwaka ve, mpe ya seko, mpe yina kele na ngolo nyonso, yina kele bisika nyonso, Ntangu Yandi ke salaka nsamunu, mpe Yandi zaba nsuka na mbandukulu, mpe Yandi lenda keba yawu.

⁷⁰ Abraham bokilaka bima yango yina vwandaka ve, mutindu ti ya vwandaka, samu ti yandi vwandaka ya muvimba ya kundima ti, yina Nzambi silaka, Nzambi vwandaka na kiyeka ya kusala yawu, samu ti Yandi zolaka sala ata mbala mosi ve nsilulu kana ti Yandi zabaka yina zolaka vwanda.

⁷¹ Beno me mona mutindu beto lenda pema na zulu ya Ndinga ya Yandi kuna? Ata wapi mutindu ngolo kitembo ke bula, yina kele ya kuswaswana na Yawu, beno pema swi na zulu ya Ndinga. Nzambi tubaka Yawu, Yina me mona lweka yankaka ya kitembo. Beno me mona? Na yawu, kana beno kele ya kubela, beno kotisa kaka moyo ya beno na Kiswamunu ya Kupema. Kana beno ke na kidi-kidi mpe na mawa, beno bambuka moyo, Yandi tubaka, “Mu ke vwanda na beno ntangu nionso, tii na nsuka ya yinza.” Mpe Yandi kele. . . Yandi tubaka, “Bima nyonso ke salaka kintwadi samu na bumbote ya bayina ke zolaka Mfumu,” na yawu beno bikana kaka kuna.

⁷² Muntu mosi sonikaka, nsoniki mosi sonikaka, “Kizundu ya munu kele ya kusimba mbote na kati ya vwale.” Yinki kele vwale? Ya kele kima yina ke kanga awa na Kuna. Mpe kizundu kele na kati ya vwale. Beno ke mona ve mutindu ya ke vwanda, kasi beno zaba ti ya kele na kima yina ke na kusimba beno, yina kele ya kusimba Kuna.

⁷³ Mpe ntangu mubu ke na kutoka mpe me dasuka, beno me . . . Mu banza ti ya lenda vwanda na bayankaka na kati ya beno me kuzwaka ata mbala mosi ve bweso ya kumona masuwa me kukanga. Oh, la la! Mu me mataka yawu ntangu ba me losaka kizundu na kati ya mubu yina vwandaka tepa mutindu *yayi*, ti mwa bricolage lendaka ve kuluta na zulu ya kitembo. Ya ke luta na kati ya kitembo. Kasi ntangu nyonso yina kizundu ke simba, ya kele nyonso yina ke sala luswaswanu.

⁷⁴ Ata ti beto ke kwenda na zulu ya yawu, na yisi ya yawu, pene-pene ya yawu, to na kati ya yawu, ya ke sala kima ve; kizundu ke simba. Ya kele mutindu ntangu bitembo ya luzingu

ke bandaka na kuningisa beto. Beto lenda luta na kati, beto lenda luta na zulu ya yawu kuna, na nsi, pene-pene, kasi beno bika kaka kizundu kuvwanda na kati ya vwale, samu na yina ke monanaka ve. Beto zaba kaka ve kieleka kisika ya kele, kasi ya kele kusimba.

⁷⁵ Kaka mutindu mwana-bakala yina ya ntwenia, beno zaba, yina vwandaka na cerf-volant. Beno me kuwaka kingana ya ntama, disolo. Yandi tubaka, “Wapi mutindu nge ke zaba ti nge kele na cerf-volant na nsuka ya yawu kuna?”

Yandi tubaka, “Mu lenda dyaka kuwa yawu kubenda.”

⁷⁶ Na yawu, ya kele mutindu yina. Kana beto lenda kuwa yawu kulandila kaka na kubenda, Nzambi na kusalaka na bantima ya beto, na yina beto zaba ti kizundu ya beto kele dyaka ya kusimba.

⁷⁷ Mu ke kwikila ti ya vwandaka Benjamin Franklin yina kangaka nzasi na kati ya mulangi, yina kangaka nzasi, lotiliki. Kima mosi na kati ya yandi bokilaka, mpe tubaka, “Ya kele na ngolo na kati ya yawu. Ngolo yina ba lendaka kanga.” Mpe kana ya kele na ngolo mingi, na kupanza babala-bala mpe kubuka bayinti, kubuka ntoto, yinki ya lendaka sala kana ba kangaka yawu mbala mosi? Ya ke vwanda na nsemo, mpe ke pela, mpe ke bula ntoto ya muvimba. Mpe Benjamin Franklin, mu ke kwikila, na kulobaka na cerf-volant ya yandi, na fungula ya kukanga na nsuka ya mukila ya yawu, mpe mbwata na yisi. Mpe ntangu yandi kuzwaka yawu, yandi zabaka ve yina yandi kuzwaka, kasi yandi bandaka na kuboka, “Mu me kuzwa yawu! Mu me kuzwa yawu!” Yandi zabaka ve yinki ya vwandaka; yandi zabaka ve yinki yandi zolaka sala na yawu; kasi yandi zabaka ti yandi vwandaka na kima mosi.

Mpe ya kele mutindu mosi na muntu nyonso yina:

Kivuvu kele ve ya kutunga na kima yankaka
Kasi na Menga ya Yesu na ludedomo;
Mpe pene-pene moyo ya munu ke na
kuyambula,
Na yina Yandi kele kivuvu ya munu nyonso
mpe lusalusu.

Na Klisto, Ditadi ya ngolo, mu me telema;
Bisika yankaka nionso kele putulu.

⁷⁸ Mbala mosi ya kubutama mbala zole, Mpeve-Santu ke baka kisika ya Yawu na kati ya ntima. Bantwenia yankaka lendaka ve, to ntwenia, to ba lendaka vwanda me longukaka ve, ata ti wapi mutindu ya kele; ya kele ve na mosi yina lenda tendula yawu, na yawu beno tala mpasi ve samu ti beno me longokaka ve. Beno lenda tendula yawu ve. Ya me vwandaka ntete ve na muntu yina lendaka tendula yawu, ata mutindu mayela to wapi mutindu ya kulonguka. Ya kele kinsweki ya Nzambi Yandi mosi. Kasi ntangu Ndinga yina ke bakaka Luzingu na kati ya ntima ya beno, mpe

beno ke mona Yawu, beno ke boka, “Mu me kuzwa Yawu!” Beno zaba ve yina beno ke sala na Yawu; beno zaba ve yina Yawu ke sala na beno; kasi beno zaba ti kima mosi me salama, mpe beno me kuzwa Yawu.

⁷⁹ Ntangu yayi, kuna, na zulu ya Ndinga! Ya kele kitoko. Ntangu yayi beto me kutana na suka yayi, mpe beto me kuzwa na ntwala ya beto, na kutala mbote, na dibanza ya munu, mosi ya masonuku ya kulutila mfunu na Ngwisani ya Ntama. *Joseph* (beto ke tubila yawu) *Me Kutana Na Bampangi Ya Yandi*. Ya lendaka vwanda na mitindu nkama mosi ya kuswaswana yina Mpeve-Santu ke kota na yayi mpe ke monisa yawu na bantima ya beto mpe mabanza ya beto. Na yawu, mu vwandaka banza mutindu yayi, na mwa bilumbu fioti awa, beto lenda tuba mwa ntangu fioti na suka yayi, samu na kukangama na laka, mpe na manima mu banza kubaka dyaka yawu na nkokila yayi kana pasteur kele ve na kima mosi na ntima ya yandi, mpe mu banza ti yandi ke landila yawu mpe ke manisa yawu na Kilumbu ya ntete na nkokila, kana mutindu yina Nzambi ke pesa yawu mutindu yina.

⁸⁰ Ntangu yayi, beto me zaba mbote na mitindu ya Ngwisani ya Ntama, mutindu ti, “Bima nyonso ya ntama vwandaka kivudi,” Hébreux 11, “kivudi ya bima yina ke na kwiza.” Wapi mutindu ya kele kitoko, wapi mutindu Nzambi vwanda zabisa na ntwala!

⁸¹ Mpe ntangu beto ke tala kivudi yayi, mutindu ya vwandaka, beto zaba ti ya kele na kima mosi na manima awa. . . . Nzambi, na kati ya ngolo ya Yandi nionso, na dibanza ya Yandi ya nene ya seko, na kumonaka kaka kima yina ke zola kusalama, Yandi lenda tuba yawu na ntwala. Yandi lenda sala nyonso kutambula kintwadi, ata mpe nganzi ya muntu, samu na kukembila Yandi, mpe muntu yina ke sala beno yimbi. Na yina beto ke baka, na manima ya mwa ntangu fyoti, kana Mfumu zola, mutindu ti mpangi ya Joseph salaka yandi yimbi, mpe Yandi balukaka mbala mosi, mpe bakaka yawu mpe salaka yawu kupesa lukumu na Yandi. Na yawu, beto kele ve na kima mosi ya kutala boma, kima mosi ve.

⁸² Wapi mutindu Nzambi yina, na nzila ya mwana-bakala yina, vwandaka talisa nkwizulu ya Mfumu Yesu na mbala ya ntete, mpe nkwizulu ya Mfumu Yesu mbala ya zole, mpe salaka yawu nyonso na luzingu yina zabaka kima mosi ve na yina me tala yina vwandaka salama. Amen. Yina ke sala kima mosi ve na beno, samu na kumona Joseph ya ntwenia ya mputu? Na yina, yandi zabaka ve yina zolaka salama, samu na yinki bima yayi nionso fwana salama. Kasi ya vwandaka nyonso Nzambi, na kusalaka, ke zabisa na ntwala, na kuzabisaka na ntwala bima yina zolaka vwanda.

⁸³ Na yina beno lenda tala Ndinga, wapi mutindu beno ke baka Yawu awa mpe beno ke tanga Yawu na Genèse, beno tanga Yawu

na kati-kati ya Buku, beno tanga Yawu na nsuka ya Buku, mpe konso Ndinga ke vukana kaka na mosi na yankaka mutindu yina. Mpe ba sonikaka Yawu bamvula mafunda ya kuswaswana, na nzila ya bankama ya bantu ya kuswaswana. Beno me mona? Na yawu, kuna, beno me mona ya kele nyonso Nzambi. Mosi na kuzabaka ve yankaka, to kuzaba yina ba sonikaka na Buku, kima ve na zulu ya Yawu; ntangu yankaka, nsungi yankaka.

⁸⁴ Mpe beto lenda mona, bubu yayi, ti Nzambi ke na kusala kaka kieleka mutindu Yandi salaka na manima kuna. Beto ke kwenda kaka na ntangu yayi, na kumanisa na mvula ya malumu, na kivudi ya Ntama. Mpe mutindu yawu na mbandukulu, mutindu ti Nzambi, ntangu Yandi monaka disumu ke baka kisika ya yawu na zulu ya ntoto mpe na zulu ya bantu, wapi mutindu ti ba me bebisa manaka ya nene; ba me vweza yawu ve, ba me vanga dyaka yawu ve, kasi ba me bebisa yawu kaka.

⁸⁵ Beno me mona, Satana lenda vanga ve. Yandi lenda kubeba kaka. Nyonso yina beno ke mona, kele yimbi, ya kele ludedomo yina ba me bebisa. Beno me mona? Beno ke mona ngangan-kisi ya ntama na bala-bala, yina kele kaka baprofete yina ba me bebisa. Beno me mona? Beno ke mona nyonso yina kele yimbi, beno ke mona bakala mosi ke zinga ve ya kukwikama na bansilulu ya yandi na kento ya yandi, yina kele ludedomo yina ba me bebisa na yimbi. Mosi to yankaka, beno mona bakento na bala-bala, ke sala mutindu bawu ke sala mpe ke kuma mutindu bawu kele, ya kele bamama yina me beba.

⁸⁶ Mu lutaka na Louisville, kilumbu yankaka yina, kento ya munu na munu, mpe mu monaka kidimbu mosi na nela mosi, kisika beto katukaka na kudia, kuna na Bala-bala ya Tanu. Mpe ya tubaka, “Bamesa samu na bamama.”

⁸⁷ Mu tubaka, “Ba me kuzwaka ata fioti ve client.” Ve, mama mosi lendaka kota kuna ve. Ntangu yandi ke kota kuna, yandi kele diaka ve mama. Beno me mona? Na yawu, bawu vwandaka na ba-client, na nsi ya kidimbu yina. Bamama ke kwendaka ve na bisika yina. Kasi, beno me mona, yina ya kele ke kota kuna, ya kele bamama yina me beba. Beno me mona? Mbote mingi.

Ntangu yayi, Nzambi, samu na kusala bima nyonso kukembila Yandi!

⁸⁸ Beto ke kembila Nowele, mbutukulu ya Mfumu Yesu. Na yina, ya kele ve kaka kieleka mukembo ya Yandi ya mbutukulu. Mbutukulu ya Yandi vwandaka na Ngonda ya yiya. Samu ti, ya ke vwandaka kaka madidi na Judée, to madidi mingi na Ngonda ya kumi na zole, kulutila yina ya kele awa. Na yawu, beto zaba yawu. Beno monaka foto kilumbu yankaka yina, batanki na kati kuna na mvula ya mpembe, mpe bima mutindu yina, na Judée. Beno lenda banza mivungi ya kuvwanda na zulu ya mongo na ntangu ya mutindu yina? Kasi, ya kele ve kilumbu yango. Kasi yawu, kilumbu yango, ya zola kutuba mingi ve, ya kele

nkadulu yina beto fwana kuzonzila kilumbu yina yina ba me tula na lweka.

⁸⁹ Ntangu yayi beno tala. Kaka na ntangu Nzambi monaka nkuna ya kento, mpe wapi mutindu ba me tendula yawu mbote ve kuna mpe ludedomo yina ba me bebisa, Nzambi pesaka nsilulu ti na nzila ya kento yina ke kwiza Nkuna ya lusakumunu. Beno me bakula yawu? Ya ke vwanda na Nkuna mosi.

⁹⁰ Mpe kaka na ntangu yina Satana kuwaka yawu, yandi yina vwandaka ya kutelama awa, ntangu yandi kuwaka yawu, yandi kotaka samu na kubebisa Nkuna yina. Mpe yandi mekaka na kusala yawu na Joseph. Yandi mekaka nyonso na kati ya bansungi. Mpe yandi kele dyaka ya kutelemina Nkuna yango ya lusakumunu. Amen.

⁹¹ Mu zola ti beno tula ba-casquette ya mabanza ya beno na mudindu, kaka na mwa ntangu fioti ntangu yayi. Mutindu, beno lwata yimpu ya kisengo ya mpulusu, mpe beno kuwa mbote ntangu yayi. Awa kele kima mosi ya mfunu mingi. Mpe beno lenda wisana ve na yawu; ya kele mbote mingi. Kasi, beno me bakula, kaka na ntangu . . .

⁹² Ya me vwandaka ntete na dibanza, ti Eve zingaka ve na ludedomo mpe salaka disumu. Wapi kisika yawu me katuka? Ya kele na Genèse. Bantu bubu yayi ke na kumeka na kuzwa kitini yina ke kondwaka na kati-kati ya kibulu mpe muntu. Yayi kele luzayikisu. Biblia ke tuba, ti, “Nyoka vunaka kento.”

⁹³ Bubu yayi, muntu lenda nata luzingu ya kibulu, mpe kibulu yina kele pene-pene mingi na muntu ya kele kimpenzi. Ba lendaka sala ti yandi kunwa fumu, kunata velo, kulwata yimpu, kukatula yawu. Ya kele kaka mutindu “gee” mpe “haw” samu na mpunda. Ya kele muningu. Yandi kele ve na moyo. Yandi lenda ve kubanza. Yandi lenda kwenda kaka na muningu. Yandi kele ve na moyo. Na yina bawu kele na kitini yina ke kondwa, kaka na kati-kati awa, ti bawu ata mbala mosi ve lendaka kumona. Mpe na kutala bamvula mafunda sambanu bawu me meka na kuzwa kima mosi na kimpenzi, mpe lenda sala yawu ve. Ba ke sala yawu ata fioti ve. Kasi, beto zaba ti beto kele luzingu ya kibulu. Beto kele luzingu ya yinti, na ntoto.

⁹⁴ Mutindu mu vwandaka tuba kilumbu yankaka yina, na mafwa ya mpangi ya beto ya kento ya luzolo. Beto kele nkonga ya bima kumi na sambanu ya ntoto, ya nsemo ya yinza, mpe pitiloyi, mpe nyonso ya kutula kintwadi. Beto vwandaka awa ntangu Nzambi tubaka mpe tubaka, “Bika ti ya vwanda,” banzutu ya beto vwandaka. Kasi, Kima mosi, Dibanza ya mfunu me sala beto na kati ya yina beto kele ntangu yayi. Yandi me pesa beto na maboko mpe na misapi, mpe nionso yina, samu na kubebisa beto ve, kasi samu beto kuzinga kukonda nsuka. Disumu me sala kubeba. Mpe Yandi Yina salaka beto, kukondwa beto kuzwa dibanza mosi—mosi ya kuvwanda awa, Yandi yina salaka beto

mpe vukisaka bima yayi kintwadi mpe salaka beto yina beto kele ntangu yayi; Yandi lenda dyaka ve, na kupesaka beto kimpwanza ya kusoola samu na kundima yawu, mpe na nzila ya Ndinga mosi yina vangaka beto, silaka beto ti Yandi ke vumbula beto diaka. Wapi mutindu ya ke vwanda na petrole yayi nionso ke vukana kintwadi, mpe ba-atome, mpe nionso yina, na . . . na nzila ya Ndinga ya Nzambi!

⁹⁵ Ntangu yayi, na mbandukulu, ntangu Nzambi zonzaka, mpe Satana vwandaka ya kutelama kuna mpe yandi kuwaka yawu.

⁹⁶ Mpe bantu ke na kumeka na kuzwa kitini yayi yina ke na kukondwaka. Mu ke tuba na beno, na nzila ya luzayikisu, kana beno zola kuzwa yawu. Muntu yina ke kondwa, na kati-kati ya kibulu mpe muntu, kele nyoka, na ntwala ba me katula yandi makulu ya yandi. Biblia me tuba, “Yandi vwandaka ya kulutila mayela na bibulu nyonso,” yina ke tambulaka na kivumu ya yandi ve, “ya bilanga nyonso.” Yandi vwandaka yandi yina vunaka kento, na kitoko ya yandi, mpe yandi kumaka na kivumu. Mpe ntangu yayi, na kusalaka yawu, mpe na kumonaka disumu vwandaka kwiza, Nzambi singaka yandi ti science ke kuzwa ata mbala mosi ve ngwisani na kati-kati ya nyoka yayi, mutindu beto me zaba bubu yayi, mpe nkonga ya bantu. Kasi yina kele kibulu yina kubwaka, ya kubwa, na kati-kati, yina kangaka luzingu ya kibulu yina kintwadi. Beno bawu yayi.

⁹⁷ “Nzambi me bumba yawu na bantu ya ndwenga mpe ya mayela, kasi ke monisa yawu na bana yina zola kulongoka.” Beno me mona?

⁹⁸ Beno tala muntu ya beno ya kubwa, nyoka. Ba basisaka yandi na nzila . . . na mayela ya yimbi, ya kulutila nene, ya kulutila kitoko, na mutindu ya kulutila muntu. Mpe na yina samu na yimbi yayi yina yandi salaka na Eve, Yandi nataka yandi kuna samu na kukomvula na kivumu, “Samu na kulandila kivumu ya yandi, bilumbu nyonso ya luzingu ya yandi, mpe fundu-fundu zolaka vwanda nsuni ya yandi.” Ya kele kisika science lenda kwiza kuna, mpe yinti ya bawu ke na kubwa.

⁹⁹ Beno tala, ntangu yayi, kaka na ntangu kento monaka ti yandi . . . Ntangu yayi, ba vunaka yandi. Yandi nataka disumu ve. Ba vunaka yandi. Yandi banzaka ti ya vwandaka kieleka. Kasi, “Adam vunamaka ve,” me tuba Biblia. Yandi zabaka ti ya vwandaka luvunu, mpe yandi zolaka ti yandi sala kima mutindu mosi yina kibulu salaka.

¹⁰⁰ Mpe yandi butaka mwana ya yandi ya ntete ya bakala, yina, kufwanana nyonso ya dyabulu vwandaka na kati ya mwana yayi ya bakala. Yandi vwandaka muntu ke kufwaka bantu. Yandi vwandaka na musoki. Wapi mutindu ya lendaka katuka na yinto ya kieleka ya Nzambi? Ya zolaka katuka na dyabulu. Mpe kaka na ntangu yandi salaka yayi, na yina yandi, diabulu, sadilaka kisadilu ya yandi.

¹⁰¹ Yandi butaka mwana ya yandi ya zole, yina vwandaka na manima ya Adam, mpe na kati kuna vwandaka Abel. Mpe, na nswalu nionso, diabulu mekaka na kubebisa nkuna yina ya mbote. Mpe yandi balukaka mpe kufwaka Abel, na kubanda; yina kele kifwani ya Judas mpe Yesu. Yandi kufwaka yandi na autel; na yina, Yesu, Judas kufwaka—kufwaka Yesu, yandi me teka Yandi na bambongo makumi tatu ya kisengo mpe me tekisa Yandi. Mbote mingi.

¹⁰² Kasi, beno tala. Ntangu yandi salaka yawu, na yina Nzambi, kifwanikisu ya Klisto, lufwa mpe mvumbukulu, Yandi telemisaka Seth na kubaka kisika ya yandi. Beno me mona? Mpe dyabulu landaka na manima ya Seth.

¹⁰³ Ntangu yayi beno tala mbote. Ntama, na ntwala ya kubeba ya yinza na mvula, ya vwandaka na dikanda ya yinda ya babakala yina kwisaka na nzila ya bana ya babakala ya Caïn, na ntoto ya Nod, mpe bawu vwandaka bantu ya science, bantu na mayele mingi, ya ngangu, ya kulutila mbote. Ba vwandaka sala bisengo. Ba tungaka bayinzo. Ba vwandaka na ba-civilisation ya kulutila mbote mingi. Biblia ke landila mpe ke tuba mutindu bawu vwanda salaka na cuivre, mutindu bawu vwanda salaka na kisengo.

Kasi, kimvuka yankaka yayi vwandaka bayengi-yengi.

¹⁰⁴ Kasi, bankonga nyonso zole vwandaka musambidi. Caïn vwandaka misambidi. Abel vwandaka musambidi. Mpe Nzambi salaka nzila, yina vwandaka kieleka. Caïn vwandaka kaka musambidi mutindu Abel. Bawu zole tungaka ba-autel. Bawu zole kwikilaka na Nzambi. Bawu zole vwandaka sambila Nzambi. Bawu zole nataka makabu.

¹⁰⁵ Ntangu yayi beno tala mbote bankuna yayi zole. Mosi, ke nwana; diabulu ke mekaka na kubebisa Nkuna ya mbote. Mpe yandi mekaka na kubebisa Abel; yandi salaka yawu, kasi Nzambi telemisaka Seth na kubaka kisika ya yandi. Yandi banzaka ti yandi vwandaka na Yesu kaka kuna. Beno tala na kati ya nsungi, bisika nyonso. Yandi, kisika nyonso yandi kwizaka, yandi nwanisaka Nkuna yina. Ntangu yandi kufwaka mosi, to yankaka, yandi banzaka ti yandi kuzwaka Yawu. Mpe, na nsuka, yandi—yandi landaka Jean Baptiste, na nsuka yandi zengaka yintu ya yandi. Yandi banzaka ti yandi vwandaka na Yandi na ntangu yina, kasi yandi monaka ti Yandi vwandaka awa na kati ya Yesu. Yandi kufwaka ba-bébé nionso. Mpe, Moise; yandi mekaka na kufwa Moise. Yandi mekaka na mutindu nionso yandi lendaka samu na kubebisa Nkuna yina, mpe ntangu yandi kufwaka Klisto na Calvaire; kasi Nzambi vumbulaka Yandi na lufwa, na kilumbu ya tatu, mpe na manima Yandi fidisaka Mpeve-Santu samu na kuvutula bana ya babakala mpe bana ya bakento na Nzambi. Mpe nkuna yina mosi ya yimbi, nkuna ya musambidi ke na kotalisa mpasi Nkuna yina ya kusungama

bubu yayi. Beno me mona yawu? Ba ke na kumeka na kubebisa Divala yina ya mbote ya Nzambi.

¹⁰⁶ Ntangu yayi, na balweka nyonso zole, kana beno tala, ya bandaka na Genèse, misambidi na balweka nyonso zole. Mosi ya bawu, ya ba-dénomination, ya mayela mingi. Mpe mosi yankaka, ya kukikulumusasa, ke tambula na Kimpeve, na nzila ya luzayikisu.

¹⁰⁷ Wapi mutindu Abel zolaka zaba ti ya vwandaka mwana-dimeme na kisika ya bambuma ya bilanga? Samu ti ya vwandaka ya kumonisama na yandi, na nzila ya luzayikisu ya Kinzambi.

¹⁰⁸ Yesu tubaka mutindu mosi, ntangu Pierre fungunaka Yandi ti Yandi kele Mwana ya Nzambi. Yandi tubaka, “Nsuni mpe menga ve me monikisa yayi na nge, kasi Tata ya Munu yina kele na Mazulu me monikisa yayi na nge. Na zulu ya ditadi yayi. . .” Ditadi, Pierre ve, Yesu ve, kasi na zulu ya luzayikisu ya Kinzambi. “Mu ke tunga Dibuundu ya Munu, mpe myelo ya difelo lenda ve kununga Yawu.” Beno me bakula yawu? Ya kele luzayikisu ya Kinzambi.

¹⁰⁹ Ntangu yayi beno tala mbote. Ngolo nyonso, ya ntangu, kuna, bawu kutanaka mbunzu na mbunzu mpe nwanaka samu na yawu. Beno tala ntangu Moab vwandaka na zulu ya mongo, mpe Israel vwandaka na kati ya kiwanda. Mpe Israel vwandaka lombaka kaka mutindu mpangi-bakala, bakala ya kieleka, na kuluta na yinsi ya bawu, samu na kukwenda na yinsi ya nsilulu yina Nzambi silaka bawu; lombaka kaka mwa réveil na dibuundu ya bawu, mutindu ya vwandaka. Kaka samu na kuluta na yinsi, mpe silaka ti bawu ke futa samu na matiti yina bibulu ke kudia. Mpe bawu zolaka kwenda na nzila ya nene ya ntinu, mpe bima yina bawu zolaka sala mutindu bawu vwandaka luta na bayinsi, mpe bawu ke sala yawu mbote. Kasi, na musoki. . .

¹¹⁰ Ntangu yayi, Moab, yinsi ya Moab vwandaka ve mumpani. Bawu vwandaka kwikila na Nzambi mosi yina Israël kwikilaka, samu ti bawu vwandaka bana ya bakento ya Lot; Mwana ya kento ya Lot yina kuzwaka kivumu na yina Lot vwandaka ya kukola malafu, na nzila ya tata ya yandi mosi. Mpe bawu kwendaka kuna, mpe bawu. . . Ya kele kisika bantu ya Moab yayi basikaka.

¹¹¹ Mpe ntangu profete ya bawu kubasikaka, mulongisi ya bawu, ya kulawuka na mbongo, mpe ba vwandaka me tula ba-autel, ba-autel sambwadi, kieleka lutangu mosi ya ba-autel yina ba lombaka awa. Awa kele Moab ya kuvwanda awa, yinsi ya nene ya ba-dénomination, nyonso ya kuvwanda mpe ya kuyidika.

¹¹² Mpe awa vwandaka Israel, mwa exalté mosi ya ntama yina vwanda yenga-yenga na batenta, na kisika na kisika. Beno ke tuba, “Exalté”? Kieleka bawu vwandaka, kana bawu—bawu kele yina bawu ke bokila, bubu yayi, exalté.

113 Ntangu bawu zabukaka Mubu ya Mbwaki, mpe Nzambi salaka kimangu na ntwala ya bawu, Miryam bakaka tambourin mpe bandaka na kubula tambourin, mpe kwendaka na kumu, yandi vwandaka boka mpe ke dumuka, mpe ke bina na Kimpeve. Mpe bana ya bakento ya Israel vwandaka landa yandi, ke dumuka, ke boka, ke bina na Kimpeve. Mpe Moise telemaka na maboko ya yandi na zulu, mbala yankaka yandi vwandaka yimbila na ndinga yina muntu mosi ve me waka ntete, nkunga yina muntu ve lendaka bakula. Yandi yimbaka na Mfumu, na Kimpeve. Kana ya kele ve ba-exalté ya bilumbu yayi, mu zaba ve kisika ya kumona bawu. Bawu vwandaka na bidimbu mpe mambu ya ngitukulu na bawu.

114 Ntangu yayi, kana Nzambi ke zitisaka kaka misiku, beno tala awa. Moab, landila Masonuku, vwandaka kaka muntu ya misiku mutindu Israel vwandaka. Yandi vwandaka na nionso yina Israel vwandaka na yawu. Yandi vwandaka na ba-autel sambwadi. Ya kele yina Nzambi lombaka; Israël vwandaka na ba-autel sambwadi. Yandi vwandaka na minkayulu sambwadi ya kuvedila. Israel vwandaka na minkayulu sambwadi ya kuvedila. Beno tala Caïn mpe Abel, dyaka. Beno me mona? Mbote mingi. Yandi pesaka bangombe sambwadi ya babakala. Yandi pesaka bangombe sambwadi ya babakala. Yandi pesaka bankombo sambwadi ya babakala, na kutubaka ti...yandi kwikilaka ti Klisto ke kwiza. Yandi pesaka dikabu ya bankombo sambwadi ya babakala, kima mutindu mosi. Kaka muntu ya musiku mutindu yandi lendaka vwanda!

115 Caïn tungaka autel; Abel tungaka autel. Caïn pesaka munkayulu; Abel pesaka munkayulu. Abel sambilaka; Caïn sambilaka. Kasi, Nzambi siamisaka, lakisaka ti Abel vwandaka nsodolo ya Yandi.

116 Nzambi me siamisa awa ti Israel vwandaka nsodolo ya Yandi, samu Israel vwandaka na kimpeve na camp ya bawu. Ata ti, na bafoti ya bawu nyonso, bawu vwandaka na Dikunzi ya Tiya yina vwandaka landa bawu. Ba vwandaka na mulemvo ya masumu samu na kubeluka ya Kinzambi, mpe vwandaka sala kisalu ya kubeluka ya Kinzambi; nyoka. Ba vwandaka na ditadi yina ba bulaka. Bawu vwandaka na bidimbu mpe mambu ya ngitukulu na camp.

117 Ntangu Jean kwizaka, yandi vwandaka ya kimpeve. Ntangu Yesu kwizaka, ya vwandaka ya kimpeve. Mpe mbeni, na lweka ya misiku, ke nwanisaka ntangu nionso muntu ya kimpeve.

118 Beno me mona yina yandi ke na kumeka na kusala bubu yayi? Kima mutindu mosi, “Beno basisa kubeluka ya Kinzambi! Beno basisa bantu yayi! Ya ke na kima mosi ve na bawu!” Bantu ya lukumu, bantu ya nene! “Beno basisa bawu na ngaanda!” Mpangi, ya kele kima ve kasi vinu yina, yina ke banda kuna na Genèse, tii na Apocalypse.

119 Mu ke baka lweka ya munu na ba-exalté!...?. . .Ti ya vwanda nyonso yina . . .Mu me monaka ntete ve exalté. Ya kele nkumbu yina dyabulu me tula na Dibuundu ya Nzambi, ntangu ya kele ve na kisika kuna. Ba kele ve ba-exalté. Ba kele bana ya babakala mpe bana ya bakento ya Nzambi, yina ba ke bakulaka yimbi na yinza.

120 Ntangu yayi, Joseph butukaka na tata ya yandi, mpe yandi vwandaka na zola ya tata ya yandi, mpe ba yinaka yandi na bampangi ya yandi. Ntangu yayi beno tala, foto ya kulunga ya Mfumu Yesu. Mu zola beno kutala mutindu luzingu ya Yandi kele kaka kifwanikisu, na Ngwisani ya Ntama, nyonso kele ya kufwanikisa ntangu yayi. Beno tala na manima kuna mpe beno mona foto; ya kele na kivudi, mpe beno ke mona yina kele positif. Ntangu yayi beno tala, Joseph, na kuvwandaka kifwanikisu ya Klisto, kifwanikisu ya Dibuundu, kifwanikisu ya Mpeve-Santu. Kifwanikisu . . .Yandi vwandaka mwana ya ntinu ya ntomoso, kaka mutindu Klisto kele, kaka mutindu Dibuundu bubu yayi.

121 Beno tala, diaka, ti, ntangu yandi butukaka, tata ya yandi zolaka yandi mpe yandi salaka yandi kazaka ya bantinta mingi. Ntangu yayi, ya kele kaka na bantinta sambwadi ya kulunga na kati ya bantinta nyonso. Bayankaka nyonso kele ya kusala na bantinta yayi. Mpe kazaka mu banza vwandaka na bantinta na kati ya yawu, na bantinta sambwadi ya kuswaswana, na banzila ya bantinta, na kati ya kazaka yina tata kusalaka. Kana beno tala, ya lendaka vwanda ti Jacob bakulaka yawu ve na ntangu yina, kasi kidimbu yina tubaka “Mwana ya Nsilulu.” Ntangu Nzambi pesaka Noé kidimbu ya mukyama, bantinta sambwadi, ya vwandaka nsilulu, to Ngwisani Mosi. Nzambi salaka ngwisani ti Yandi ke bebisa yinza dyaka ve na maza.

122 Mpe ngwisani ya Nzambi vwandaka diaka ya kukangama na Jacob, na kati ya Joseph. Abraham vwandaka nsodolo, mpe Isaac vwandaka kunungisama, mpe Israël vwandaka lemvo, mpe Joseph vwandaka ya kulunga. Yina vwandaka kaka yina vwandaka na bantinta.

123 Beto ke mona Yesu ya kuvwanda na zulu ya Kiti ya kimfumu, na bantinta, mukyama pene-pene ya Yandi, na Apocalypse 1. Ya vwandaka ngwisani ya Nzambi na bantu. Klisto . . .Yawu yayi. Oh, mutindu mu zola beno kumona yawu! Klisto kele ngwisani ya Nzambi na bantu ya Yandi. Ba-denomination ve; kasi Klisto kele ngwisani ya Nzambi.

124 Mutindu ba yinaka Joseph, mutindu mosi ba me yina Klisto bubu yayi. Bawu zola ve kutuba ti bawu ke yina Klisto, kasi bisalu ya bawu ke talisa yina bawu ke salaka. Ba ke teleminaka konso nsalulu ya Yandi; ba ke zonzila kisalu ya Yandi, bisalu ya Yandi, bisalu ya Yandi ya kitoko. Mbote, ya kieleka, beto kele na Satana na camp, dyaka, ke na kupusa. Ya kieleka. Mpe ba ke talisa bandinga ya Satana. Kasi, mu ke kipe ve yina Satana ke

sala samu na ku—kumeka kukotisa muvusu. Ndinga ya Nzambi kele ya kulunga, mpe nsilulu ya Yandi kele ya kulunga. Mu ke zola ata fioti ve kubasika na kimvuka yina.

¹²⁵ Beno tala, kuna Yandi vwandaka, Ngwisani. “Klisto vwandaka talana mutindu jasje mpe sardoine,” na Apocalypse. Yina vwandaka ditadi ya ntulu...ditadi ya mbutukulu, mu zola tuba, kubanda na Ruben tii na Benjamin. Yina vwandaka kifwani ya sardoine mpe jasje, mutindu bawu vwandaka talisa kintwadi na nsi ya Nsemu ya Nzambi, salaka ngwisani na ziunga ya Klisto, mukyama. Mpe yinki yawu ke zonzila? Ruben, kuluntu; Benjamin, ntwenya ya kulutila! Kubanda ya ntete tii na ya nsuka, “Yandi vwandaka yina Vwandaka, Yina kele, mpe Ke Kwiza; Nsimbulu, Nkuna ya David. Yandi kele Mbwetete ya Suka. Yandi kele kubanda A tii na Z; Alpha, Omega; Kutalana ya Nzambi kubanda na ntangu ya nsuka ya ntangu. Yandi yayi, ngwisani ya Nzambi na bantu ya Yandi.

¹²⁶ Mpe bima nyonso yankaka yayi, Joseph, David, bapofete nyonso, vwandaka kaka kifwani. Amen. Na kulakisaka, kubanda na Nkuna ya kieleka na disamba ya Eden, tii na ntangu yina Yandi ke kwiza mbala ya zole, na Nkembo, samu na kuyamba bantu ya Yandi mpe Dibuundu ya Yandi. Yawu yina, ya ke kitoko na kutala.

¹²⁷ Joseph, bampangi ya yandi vwandaka na lunangu na yandi. “Ba yinaka yandi, kukondwa dyambu,” samu ti yandi vwandaka kieleka landila misiku yina vwandaka ya kutwadisama na kimpeve. Beno me bakula yawu? Cain yinaka Abel, kukondwa dyambu, samu yandi vwandaka me twadisama na kimpeve. Moab yinaka Israël, kukondwa dyambu, samu ti bawu vwandaka na kubeluka ya Kinzambi, bidimbu, mambu ya ngitukulu, mpe bimangu. Ba yinaka yandi, kukondwa dyambu, mpe zolaka ve kubika yandi kuluta . . .

¹²⁸ [Kisika ya mpamba na bande—Mu.] . . . samu na kuzwa kento ya mpangi ya nge ya bakala. Amen. [Kisika ya mpamba na bande.]

¹²⁹ Ntangu yayi, bankundi ya munu ya luzolo, mu zola kunata kima mosi na mabanza ya beno, mpe mu zola ti beno tula yawu na nsi ya lupanzi ya tanu na lweka ya kikento, na kati ya tenta ya kitini yina ya ntima.

¹³⁰ Ata mbala mosi ve, na nsungi mosi to na ntangu mosi, ti Nzambi twadisaka muntu na kimpeve, ti yandi kwendaka na lweka ya misambidi, bantu yina ba ke bokilaka misambidi ya yinza. Ata mbala mosi ve ti yandi me salaka na ba-dénomination. Ntangu nyonso, yandi ke teleminaka, mpe ke teleminaka ba-denomination ya kilumbu yayi, mpe ke teleminaka ndonga ya misambidi ya kilumbu yayi. Beno lakisa munu profete mosi, beno lakisa munu kilumbu mosi na kati ya Biblia, ti bakala mosi

ya Nzambi me salaka na yina ba ke bokilaka ba-mouvement ya misambidi ya kilumbu ya yandi. Amen.

¹³¹ Mpe Elie, na manima yandi tungaka lukolo ya bapofete, na yina, ntangu yandi mataka kuna, bawu zolaka ti yandi kwenda. Yandi tubaka, “Ya kele mingi ya kusungama awa.” Beno me mona? Achab mpe bantwadisi ya misambidi ya kilumbu ya yandi; Elie kabwanaka yandi mosi, na Mongo Carmel.

¹³² Beno tala mbote Jean Baptiste, yandi kabwanaka yandi mosi, ata mbala mosi ve kwendaka na lukolo ya bawu, samu na kulongoka théologie ya bawu. Kasi, Nzambi fidisaka yandi na ntoto ya kuyuma, samu na kukubika yandi samu na kisalu.

¹³³ Caïn me vwandaka ata fioti ve na kiyeka ya kutula kazaka ya bawu ya dibuundu na zulu ya muntu ya Nzambi. Ya ke simba ve. Ya kele kieleka. Beno tala, na kati ya bansungi.

¹³⁴ Mpe ntangu Yesu kwisaka, Yandi me yufulaka ata fioti ve mosi ya ba-théologien, kasi bokilaka bawu, “Nkongga ya banyoka, to banyoka na kati ya matiti.”

¹³⁵ Ata mbala mosi ve ti bilandi vukanaka na mosi ya ba-dénomination ya bawu. Bawu vwandaka na lweka ya Abel.

¹³⁶ Ata mbala mosi ve ti Joseph vukanaka na bawu. Ba yinaka Yandi mpe ba mangaka Yandi, samu na lukanu mosi yina bayankaka ya bawu vwandaka. Samu ti, Nzambi vwandaka na yandi na mutindu ya kimpeve, mpe na mutindu yankaka na yina Yandi vwandaka na bayankaka ya bawu. Mpe bawu yinaka yandi, kukondwa dyambu. Caïn yinaka Abel, kukondwa dyambu. Bampangi ya yandi yinaka Joseph, kukondwa dyambu.

¹³⁷ Mpe, bubu yayi, yinza ya denomination, ata mutindu nene yawu kele; Mu ke katula yimpu ya munu, mpe mu ke tuba, “Matondo na Nzambi samu na bawu.” Kasi, na malongi ya bawu nyonso ya nene, mabuundu ya bawu ya nene, bima ya nene; kasi, na kati ya nyonso yina, Nzambi ke bokila bantu na kuvwanda na kima ya kusala na yawu ve, samu bawu ke wisana ve na kimpeve. Ya kele na kulandila, bubu yayi; mpe ba ke yinaka mouvement yina, kukondwa dyambu.

¹³⁸ Mu kuwaka muntu kutuba kilumbu yankaka yina, yina sobaka menga ya munu na maza, samu na kuwa muntu na kuzabana, mulongi ya nene ya Baptiste.

¹³⁹ Mpe yandi vwandaka tubila, ti, ya vwandaka ve na Masonuku samu na muntu nionso na kusambila mwense Marie. Ya kele kieleka! Ya kele kieleka. Yandi tubaka ti ya vwandaka ve na Masonuku, samu na kusambila muntu nyonso kana ti Klisto. Ya kieleka. Yandi tubaka, “Nzambi vwandaka na kati ya Klisto, mpe na kati ya Yandi vwandaka muvimba ya Bunzambi.” Ya kieleka.

¹⁴⁰ Mpe kuna, na manima ya nyonso yina ya mbote, ya malongi ya Masonuku ya mbote, ya kuvutuka mpe kutuba, “Ata mbala

mosi ve ti ya vwandaka na kimangu yina kusalamaka na yinza.” Samu ti yandi kele na mpasi mingi samu na kubeluka ya Kinzambi, me baluka mpe me tuba, “Ya me vwandaka ntete ve na kimangu yina ba salaka na manima ya lufwa ya Klisto. Muntu ve ata mbala mosi ve vumbulaka bantu ya kufwa, na manima ya Klisto, samu ti Yandi vwandaka Yandi yina kaka kuzwaka Luzingu ya Kukonda nsuka.”

¹⁴¹ Kasi, mu ke tuba na beno, ti Yesu Klisto, Mwana ya Nzambi, tubaka na bilandi ya Yandi, “Kwenda mpe longi Nsangu ya mbote; belusa bambevo; mpe kuvumbula bamvumbi; mpe vedisaka bambevo ya wazi.” Ya kele yina Yesu tubaka na bilandi ya Yandi.

¹⁴² Wapi mutindu bantu lenda kuma ya kufwa meso mingi na mutindu ya nsambulu? Bawu me kuma na mabanza ya kukangama samu na bibaka ya denomination mpe ke yina bampangi ya bawu, kukondwa dyambu. Beno me mona yawu? Ya kele fyoti mingi, na yawu fyoti, bawu ke salaka yawu samu na lukumu ya bawu.

¹⁴³ Mulongi ya nene ya yinsi bubu yayi, ba yufulaka yandi samu na yinki yandi kuzwaka ve mbotika ya Mpeve-Santu, na manima ba me monisa yawu na bantu yankaka ya kutelama ya yandi, bayina kuzwaka mbotika ya Mpeve-Santu. Yandi tubaka, “Ya ke niongisa ministere ya munu.” Kana nge tuba na munu, na konso ntangu . . .

¹⁴⁴ Ya lendaka niongisa ministere ya muntu mosi, kasi ya ke niongisa ata fioti ve ministere ya Yesu Klisto yina ba ke sadila. Ya ke kwenda na ntwala samu na ministere ya Yesu Klisto.

¹⁴⁵ Kasi Tata Docteur me tuba ti ya vwandaka ata fioti ve muntu mosi vumbukaka na lufwa. Yandi tubaka, “Mu zaba ti ya kele na nkonga ya ba-exalté na yinsi bubu yayi, yina ke tuba ti bawu me mona bantu ya kufwa kuvumbuka. Kasi,” yandi tubaka, “ah! Ya kele ata mbala mosi ve na kimbangi ya science ya bakubeluka to kima yankaka.”

¹⁴⁶ Ntangu yayi, beno me mona, yawu yayi, mpangi ya munu ya bakala mpe mpangi ya kento. Mu zola ti beno tala yayi kieleka mbote. Kikuma yawu yina, kele yayi. Bubu yayi, babakala . . .

¹⁴⁷ Na bilumbu ya Mfumu Yesu, na bilumbu ya Ngwisani, ntangu bantu kwikilaka na Nzambi, bawu kuwaka kimangu kusalamaka, bawu mekaka ata mbala mosi ve na kulakisa yawu na science. Bawu ndimaka yawu. Bawu kwikilaka yawu kaka, samu bawu zabaka ti Nzambi vwandaka.

¹⁴⁸ Kasi, bubu yayi, nkonga ya bantu ya ntembe me kota na ba-mouvement ya misambidi, mpe yandi ke na kumekaka na kulakisa bima landila science.

¹⁴⁹ Mpe bika mu tuba mutindu yayi, mutindu ya me katuka na Mazulu, mu ke kwikila, na ntima ya munu. Ya kele ata

mbala mosi ve na ntangu ti ya lendaka talisama. Samu ti, kana beno lendaka siamisa Nzambi, na yina Yandi keke dyaka ve ya kundima na nzila ya lukwikilu; ya keke kidimbu. Beto ke kwikilaka na Nzambi mpe bimangu ya Yandi, na lukwikilu. Beto ke bokilaka bima yina keke ve, mutindu ti yawu vwandaka, samu ti Nzambi tubaka yawu; ata nyonso yina yawu keke.

¹⁵⁰ Abraham lendaka talisa ve ti misisa ya miliki ya Sarah vwandaka ya kuyuma ve. Yandi zolaka lakisa ve ti—ti dilonga ya nene, mpe nyonso yina, kumaka ya kusoba. Bawu, yandi lendaka... Ba lendaka talisa ve kima yayi. Bawu lendaka siamisa ve mbala yankaka, na nzila ya kumekama ya nkuna, ti bawu vwandaka buta mbuma. Kasi yandi kwikilaka yawu, na mutindu nionso, mpe yandi losaka konso kima yina vwandaka ya kuswaswana na yawu, mpe bokilaka bima yango yina vwandaka ve, mutindu ti ya vwandaka. Samu ti, na kati ya vwale, kivuvu ya Nzambi kupemaka na zulu ya Ndinga ya Nzambi, mpe bokilaka bima yango, landila science to ve, “Kieleka, samu ti Nzambi tubaka yawu.” Beno bawu yayi.

¹⁵¹ Beto ke kwikila. Na lukwikilu beto ke kuzwa yawu. Kasi, kana mpangi-bakala, kutula ntembe ve na yandi, mu ke kwikilaka yawu ve. Kasi kana mpangi zolaka tanga kaka yina wapi mutindu ba losaka Paul matadi na lufwa, mpe basantu telemaka na zulu ya yandi mpe sambilaka tii luzingu vutukaka na kati ya yandi. Mutindu ti Paul longaka mpimpa nyonso, nkokila mosi, mpe muntu mosi kubwaka na zulu ya yinzo mpe kufwaka yandi mosi, ntwenya ya bakala; mpe Paul lalisaka nzutu ya yandi na zulu ya yandi, mpe Mpeve ya luzingu vutukaka dyaka na kati ya yandi. Mutindu Elie vumbulaka bébé ya kento mosi na manima yandi me kufwa, ata mpe bamvula bankama nana na ntwala ya Nkwizulu ya Klisto. Bantu, mpe kukondwa lusakumunu ya Mpeve-Santu, salaka bimangu ti bantu yayi keke na boma ya kukangama na Mpeve-Santu. Oh, la la! Mawa!

¹⁵² Samu na yinki? Ya keke samu ti bawu keke na lufundu, mpe bawu ke yinaka bampangi ya bawu, kukondwa dyambu; kaka mutindu ba yinaka Joseph, kukondwa dyambu. Beno me mona yawu? Ba yinaka yandi. Ve samu ti yandi vwandaka ya kulunga samu na kuyina yandi; samu ti, kukondwa dyambu. Ba kwikilaka yandi ve. Yandi vwandaka zinga na kitezo ya mutindu na mutindu.

¹⁵³ Mpe mu ke tuba yayi, ntangu yayi, na yina ntangu ya beto ke na kukumaka nkufi. Mu ke tuba yayi na kundima nyonso ya ntima. Ba ke yinaka Dibuundu, bubu yayi, yina keke na kimpeve. Ya keke musoki. Ya keke na musoki, mpe ya keke zinga na kati-kati ya bantu.

¹⁵⁴ Bilandi vwandaka na yawu. Ba vwandaka na nsoni mingi samu na bawu mosi! Samu, bilumbu kumi na ntwala, Nzambi pesaka bawu ngolo ya kubelusa bambevo, mpe kubasisa

bampeve ya yimbi, mpe samu na kuvumbula bantu ya kufwa. Mpe ba vwandaka na mwana ya épilepsie na ntwala ya bawu, mpe bawu kubwaka. Mpe Yesu, ntangu Yandi kulumukaka na mongo, mpe belusaka mwana ya bakala. Mpe bawu yufulaka Yandi, “Samu na yinki beto me lenda ve?” Yandi tubaka ve, “Mu—mu vutulaka Ngolo ya munu.” Yandi tubaka, “Mu ke pesa beno Ngolo.” Mu ke lakisa beno kisika Yandi pesaka Yawu na Dibuundu, kasi beno lenda lakisa munu ve kisika Yandi vutulaka Yawu. Beno me mona? Wapi Yesu pemisaka Bandinga ya Yandi ya lukumu? “Samu na kukondwa lukwikilu ya beno.”

¹⁵⁵ Mpe kuna, mwa bilumbu na ntwala, bawu talaka muntu yina vwandaka ve na kitezo ya bawu ya dibuundu. Yandi kuwaka Yesu kutuba bima yayi, mpe yandi vwandaka sala kisalu. Yandi vwandaka basisa bampeve ya yimbi. Mpe Pierre na Jean kwizaka tuba na yandi ti yandi zolaka vwanda ya kimvuka ya bawu to yandi zolaka sala yayi ve. “Nge fwana landa beto mpe kukangama na beto. Beto kele dibuundu, mpe nge fwana kusala yawu!” Yandi bikaka bawu zaba kukwisa na mumbongo ya bawu. Yandi vwandaka tambula mbote kukondwa kukota na organisation ya bawu.

¹⁵⁶ Na yawu, mutindu bana ya fyoti, ya kulemba ya kento, mutindu beto kele na yawu bubu yayi; mwa, mabanza ya bana, ya bantwenya, ba vwandaka vutuka na manima mpe vwandaka tuba, “Beto me mona yandi, mpe yandi vwandaka basisa bampeve ya yimbi.” Mpe yinki ya vwandaka? Ba vwandaka na musoki samu yandi vwandaka sala yina ba lendaka ve kusala. Ba vwandaka na nsuni. Meso ya bawu, ya lubakusu ya bawu, vwandaka mutindu bampangi ya Joseph, ba vwandaka ntete ve ya kutemuka, na yawu bawu vutukaka mpe kwendaka na yandi, mpe tubaka na Yesu.

¹⁵⁷ Mpe Yesu tubaka, “Bika yandi.” Amen. “Yandi ke na kusalaka kisalu ya mbote. Yandi ke na kusalaka yina mu tumaka beno na kusala, mpe beno kondwa na kusala yawu.” “Nzambi kele na kiyeka na matadi yayi kubasisa bana samu na Abraham.”

¹⁵⁸ Na yawu ntangu yayi, bankundi ya munu ya luzolo ya ba-Methodiste mpe ya ba-Baptiste mpe ya ba-Presbytérien, samu ti beno ke banza ti ya fwana luta na dibuundu ya beno, Nzambi kele na kiyeka ya ba-exalté yayi na kubasisa matadi na Abraham. Ya kele kieleka. Yandi ke kuzwa muntu yina ke sala kisalu ya Yandi. Ya kele kieleka. Na bayimbi ya bawu nionso mpe bilele ya nsoni mpe nionso yina, bawu ke sala, mutindu mosi Israel salaka kima ya mutindu mosi, kasi Nkuna yina ya mbote ke na kukwenda na ntwala.

¹⁵⁹ Mu kele na kyese mingi ti mu lenda tuba ti mu kele mosi ya bawu. Na lemvo ya Nzambi, bubu yayi, beto kele mosi ya bawu. Mu kele na kyese mingi samu na yawu, beno ve? Ntima ya munu

ke sepela, na mbandukulu ya mvula yayi ya malu-malu, samu na kuzaba ti Nzambi, na nzila ya lemvo ya Yandi ya ngitukulu, me tala nkumbu ya munu na kati ya Buku ya Luzingu, samu na kupesa munu lubakusu yina mu kele na kati ya bantu ya Yandi yina ba losaka. Mpe, na bilandi, mu lenda tuba yayi, mu ke tanga yawu bweso na kunata nsoni ya Nkumbu ya Yandi. Yinga, tata. Mu kele na kyese mingi ti mu kele mosi ya bawu.

¹⁶⁰ Mpe ntangu yayi beto ke banda awa na Joseph, na lukutakanu yina ke landa, yina lenda vwanda na nkokila yayi to na Kilumbu ya ntete na nkokila, mosi, samu ti ntangu ya beto me kuma.

¹⁶¹ Kasi, mu zola Yandi. Beno zola Yandi ve? Yandi kele mbote. Mpe mu ke na kiese mingi bubu yayi ti mu lenda vukisa maboko na nsinga yina ya yinda ya bantu ya kiadi mpe yina ba me losa, mpe yina ba me yina na banganga-Nzambi kuna na kati ya yinsi. Bawu yayi. Bawu kele yisi mingi. Ya kele kieleka. Banganga-Nzambi, na kuzonzilaka yinza, ndongosolo, mpe nzonzolo ya bantu, bawu kele na zulu ya bawu. Mpe beto kele na kyese na kuvwanda ya kukikulumusa. Samu ti, bayina ke kukikulumusa bawu mosi, Nzambi ke kwiza kilumbu na mbala ya zole, na Nkembo, samu na kukembila Dibuundu ya Yandi. Tii kuna, “Beto kwenda na nswalu nionso samu na Lukwikilu yina pesamaka mbala mosi na basantu.”

Beto sambila.

¹⁶² Ntangu yayi na bayintu ya beto ya kukulumusa, mu ke kukiyufula kana ya ke vwanda na mosi na suka yayi, to mingi, mu banza, bayina me ndimaka ntete ve Klisto yayi, mpe balusakumunu ya Yandi ya nene mpe bangolo ya Yandi ya nene. Mpe beto ke na kukiyufula, bubu yayi, kana beno lenda sala nsodolo ya beno bubu yayi, mpe kutuba, “Mfumu Yesu, ya kele munu. Mpe mu zola vwanda kisadi ya Nge, na ntima ya munu ya muvimba, samu na kutambula na mwa bantu ya kiadi ya Mfumu. Mu ke mona ntangu yayi, Mfumu, ya kele ve yina yinza ke zonzila; ya kele yina Biblia ya Nge ke zonzila. Ya kele ve yina yinza ke bokilaka munu. Ba ke yinaka munu, mutindu bawu salaka na Joseph. Ba ke yinaka munu, mutindu bawu salaka na Abel. Ba ke yinaka munu, mutindu bawu salaka na Jean. Ba ke yinaka munu, mutindu bawu salaka na Daniel. Ba ke yinaka munu, mutindu bawu salaka na Ezéchiél, mutindu Zacharie. Ba ke yinaka munu, mutindu bawu salaka na Yesu. Ba ke yinaka munu, mutindu bawu salaka bantumwa mpe bayina landaka Nge, kukondwa dyambu. Mfumu, mu ke sambila samu na bawu.”

¹⁶³ Beno me kuzwaka ntete nzingulu mutindu yina, ti beno me basika? “Mpe beto kele kinganga-Nzambi ya kimfumu, yinsi ya santu, na kupesaka minkayulu ya kimpeve na Nzambi; ya kele, bambuma ya bikoba ya beto, na kupesaka Yandi lukumu.” Beno lenda telama na kati-kati ya yinza ya kidi-kidi? Beno lenda

telama na ntwala ya mfumu ya beno ya kisalu? Beno lenda telama na kukikulumusa na kati ya ntima ya beno, na zola na kati ya ntima ya beno, samu na bansumuki ya yinza yayi, na Luzingu ya Klisto na kati ya beno, mpe beno pesa kimbangi mpe nkembo na nkembo ya Nzambi? Kana beno kele ve na nzingulu yina, samu na yinki beno ke banda ve yinza, luzingu, bima nionso ya malu-malu, bubu yayi, na kutelemisaka diboko ya beno na Yandi, mpe kutuba, “Mu ntangu yayi, Mfumu, ndima yawu, mpe mu zola ti Nge pesa munu mbotika ya Mpeve.”

¹⁶⁴ Ntangu yayi, Tata ya beto ya Mazulu, Dibuundu ya fioti na suka yayi me telama, beto zaba, ba me baka yandi, ba me kufwa yandi na munduki, mbeni me niongisa yandi, yandi me panza makonga ya yandi. Mpe beto ke sambila samu na mioyo ya bawu ya masumu, Mfumu. Bawu zaba ve ti bawu kele ya kufwa meso na nzambi ya yinza yayi.

¹⁶⁵ Dibuundu, na bunene, bisika nyonso na yinza bubu yayi; mbeni, bantu ya misambidi, me kufwa bawu na munduki na matolotolo-tolo nionso. Kasi na kati ya nionso yina, reveil ya nene ke na kusalama. Bamafunda ya bana ya kukikulumusa, ya mputu, yina ba me losa me kukota na kati ya bisika yayi, mpe me mona diboko ya Nge ya kimangu, yina me fuluka na Mpeve-Santu. Mpe bawu kele dyaka ve ya yinza yayi. Bawu kele bizyeti mpe banzenza. Bawu ke kipe ve yinza, kasi bawu ke na kusosa Mbanza yina ke na kwiza, yina Kitungi mpe Kiyidiki kele Nzambi. Ba me mona ngolo ya Nge ya kubeluka, samu na kubelula bambevo, bidimbu mpe mambu ya Nge ya ngitukulu kusalama na kati ya bantu ya Nge. Bima ya nene ke katukaka, na bisika yina ba ke fundisa yawu mpe ke meka na kukangama na yawu. Bisadi ya nge ke kota mbala mosi mpe ke sala balukutakanu ya réveil, mpe bawu ke kombola ya kukikulumusa na Kimfumu ya Nzambi.

¹⁶⁶ Na kati-kati ya beto na suka yayi, beto kele na bweso ya kuzwa ba-missionnaire yayi yina ke na kwendaka na bayinsi yankaka.

¹⁶⁷ Mosi, me katuka na Israel. O Nzambi, yawu yina. Mwangisa Mpeve ya Nge, na yandi, Mfumu. Mpe bika ti bima ya nene kusalama, mpe kusala ti ba-Juif yina ke yenga-yenga na kuvutuka. Ti bawu kuzwa Mpeve-Santu, mutindu batata ya bawu kusalaka na mbandukulu.

¹⁶⁸ Awa kele na mpangi mosi ya bakala yina ke na kwendaka na Cuba, kuna na bisanga. Beno ke tuba, “Na bansuka ya ntoto.”

¹⁶⁹ Kima mosi ke benda, ke pusa na ntima ya bampangi yayi. Ba ke bika bayinzo ya bawu, bankundi ya bawu ya luzolo, biese mpe bantangu ya mbote ya yinza yayi, kasi ba ke kwenda kuna na bantoto ya kuyuma kuna; na nsi ya oposiso, ke meka na kutelemisa kisalu. Kasi kaka mutindu ngombe yina vutulaka kitunga, na misiku na zulu ya yawu, mpe sanduku

ya ngwisani, bawu bikaka bana ya bawu ya fioti kuboka, mpe bawu kwendaka na bala-bala, ke dila, ke yimbila, ke kulumuka na Ditadi.

Beto ke tonda Nge samu na konso mulongi.

¹⁷⁰ Beto ke mona ya kuvwanda na dibuundu ya beto, Mpangi John, na suka yayi, diaka, kuna na Allemagne. Wapi mutindu ba me telemisa yandi, mputu. Me benda mwa wagon mosi na yinsi, samu na kulonga Nsangu ya mbote. Matondo na Nge samu na yandi!

¹⁷¹ Mpe bantwenya ya babakala yayi, mpe milongi yankaka yina kele ya kuvwanda pene-pene, mpe misambidi nyonso. Ntangu mu yufulaka, Tata, na kukwikilaka ti na nsi ya ntangu mutindu yayi, ti kana bakala to kento vwandaka na Klisto ve na kati ya ntima ya bawu, ba zolaka telemisa diboko ya bawu, ya kieleka, na kumonaka kidimbu nionso ya Nsangu ya mbote, ti Nge kele mutindu mosi mpe Dibuundu ya Nge kele mutindu mosi.

¹⁷² Mu ke tonda Nge samu na muntu nionso. Mu ke sambila ti Nge ke sakumuna bawu. Mpe belusa banzutu ya bawu kana bawu kele ya kubela, mpe pesa na bawu bansatu ya ntima ya bawu. Pesa yayi, Tata, beto ke lomba yawu na Nkumbu ya Yesu.

¹⁷³ Mpe na bayintu ya beto ya kukulumusa, beto banza kaka mwa ntangu fyoti. Beno vwanda kaka na bisambu, na lembami nionso.

Muntu ya ntete yina kufwaka samu na dyambu
ya Mpeve-Santu yayi,
Vwandaka Jean Mubotiki, kasi yandi kufwaka
mutindu muntu;
Na manima kwizaka Mfumu Yesu, ba komaka
Yandi na kulunsi,
Yandi longaka ti Mpeve ke vulusa bantu na
masumu.

Na manima ba losaka matadi na Étienne, yandi
longaka na kuteleminaka disumu,
Bawu, na kudasuka mingi, bawu pasulaka
yintu ya yandi;
Kasi yandi kufwaka na Mpeve, moyo ya yandi
kubasikaka,
Mpe kwendaka vukana na bayankaka, bayina
pesaka baluzingu ya bawu.

Ya vwandaka na Pierre mpe Paul, mpe Jean ya
ntumwa,
Ba pesaka baluzingu ya bawu samu Nsangu ya
mbote yayi lezima;

Ba vukisaka menga ya bawu, mutindu baprofete ya ntama, (Yina kele dyaka Nkuna, yina ba talisaka mpasi.)

Samu Ndinga ya kieleka ya Nzambi kupesama na kusungama.

Ya vwandaka na moyo na yisi ya autel, vwandaka dila, “Bantangu yikwa?”

Ntete Mfumu kunganina bayina kusalaka yimbi;

Kasi ya ke vwanda na mingi yina ke pesa menga ya bawu ya luzingu

Samu na Nsangu ya mbote ya Mpeve-Santu yayi mpe kufuluka ya yawu ya mbwaki.

Ke na kubasika menga, yinga, ya ke na kubasikaka menga,

Nsangu ya mbote ya Mpeve-Santu yayi ya ke na kubasika menga ya mingi,

Menga ya bilandi yina kufwaka samu na Kieleka,

Nsangu ya mbote ya Mpeve-Santu yayi ke na kubasika menga.

¹⁷⁴ [Mpangi Branham ke na kuyimba na kati ya yinwa *Ya Ke Na Kubasisa Menga*—Mu.]

¹⁷⁵ O Nzambi! Kwisa, Mfumu Yesu! Yidika beto ntangu yayi na yina beto kele ya kukikulumusa na ntwala ya Nge. Katula kukondwa kukipe nionso na baluzingu ya beto, na bantima ya beto, na yina lembami ya Mpeve ke monana na meso ya bantu-ndombe. Nzambi ke na kubaka Ndinga ya Yandi ntangu yayi mpe ke na kumwangisa Yawu maza. Beto kele na kyese mingi ti Nge me tula na kati ya beto, Tata, samu na kuvwanda bayina ke zitisaka Nsangu ya mbote.

¹⁷⁶ Beto ke sambila samu na konso nsatu ya dibuundu. Beto ke sambila samu na pasteur ya beto ya luzolo, O Nzambi; kisadi ya kukwikama, ya kulemba ata fioti ve, ntangu nionso. Zonza na ntima ya yandi, bubu yayi, mpe ti yandi zaba ti ya kele na musendo ya nene yina ke na kuingilaka kuna samu na ba-pasteur yina ya kukwikama ntangu bawu ke vukana kuna na simu yina yankaka na bantu nionso ya kuvulusa.

¹⁷⁷ Sakumuna ba-pasteur yankaka, mpe ba-missionnaire, mpe bamambele ya Nzutu ya Klisto, bisika nyonso. Lemvokila beto banzimbani ya beto, Mfumu.

¹⁷⁸ Mpe ntangu yayi kana ya kele na nsatu na kati ya bantima ya beto, Mfumu, Nge zola ve, na yina Nge kele awa, sakumuna beto? Kana ya kele na kimbevo na kati ya beto, Mfumu, muntu yankaka, yina me kota na mwa dibuundu bubu yayi, mpe bawu ke tala kuna mpe bawu ke mona Calvaire, ke mona kuna kisika Nkuna ya kieleka. Kisika Satana banzaka ti yandi lendaka

bebisa Yawu na lufwa, kasi Nzambi vumbulaka Yawu diaka. Mu lenda ve kusala yawu! Nzambi me sala nsilulu, mpe Nzambi ke kangama na nsilulu ya Yandi. Mpe nsilulu nionso kele kieleka. Nge silaka beto Luzingu ya Kukonda nsuka, mpe beto kele na Yawu. Beto ke kuwa Yawu. Ya kele na Kima mosi na kati ya beto, yina ke na kutambula, yina beto lenda tendula ve. O Nzambi! Na kati-kati ya mpasi, beto ke kuwa ti Kima mosi me simba mbote kuna na manima, “Beno vwanda kaka swi.” Bitembo lenda bula Nkuna, masuwa lenda bula mwa bwatu ya beto. Nge ke sala nzila, na nsi, pene-pene, to na nzila ya yawu, na mutindu nionso. Na yina, beto ke telemina Ndinga, Mfumu.

¹⁷⁹ Mu ke sambila ntangu yayi ti kana muntu mosi kele ya kubela na lukutakanu, ti Mpeve yayi, yina kele na kati ya kivinga kaka ntangu yayi, ke kulumuka na zola ya nene, ke tuba, “Mwana ya Munu, yayi kele Munu. Mu kele Tata Yina vangaka nge. Mu vwandaka Yandi Yina nataka bima na ntoto, yina salaka beno yina beno kele. Satana ke na kumeka na kukota na kisalu ya Munu. Baka nsilulu ya Munu, mwana.”

¹⁸⁰ Mpe kisambu yayi ya lukwikilu mu ke pesa, na kukwikilaka ti Nge kele awa. Bika maboko ya Nge, Mfumu, ya kutandama na konso ntima, mpe bimbevo ke katuka na bantu. Mu ke nganina diabulu; diabulu yina ke telemina, diabulu ya boma, diabulu ya kimbevo ya mutindu nionso. Nge me tuba, “Na Nkumbu ya Munu ba ke basisa bampeve ya yimbi.” Na kuvukana ya dibuundu yayi, mpe Mpeve yayi na suka yayi, beto ke katula konso mpeve ya yimbi na bantu; ti beto ke katuka awa, ya kukondwa mvindu, na nzila ya Munkayulu ya Mfumu Yesu, na yina beto ke ndima Yawu na kukikulumusana nionso.

¹⁸¹ Sakumuna beto na mutindu ya mpasi. Sakumuna beto na nionso yina beto ke sala. Kwenda na milongi mpe na ba-evangeliste mpe na ba-missionnaire, na bisika ya bawu, Mfumu. Pesa kilumbu mosi beto ke kutana na—na makulu ya Nge. Na yina beto ke tulula ba-trophée ya beto. Nzambi, bawu ke vwanda na bifwanikisu nyonso. Ya ke vwanda na mundele, muntu ya jaune, muntu ya ndombe. Beto nyonso kintwadi, beto ke tuba, “Mfumu, bawu yayi.” Wapi kilumbu ya kusepela ya ke vwanda! Beto sala na yina ya kele kilumbu, samu na nkokila ke kwiza ntangu muntu ve lenda sala. Beto ke lomba balusakumunu yayi na Nkumbu ya luzolo ya Mwana ya Nzambi, Yesu Klisto. Amen.

Mambu nionso ke salama, kwikila kaka;
Kwikila kaka, kaka . . . (Yinki ya kele?)
Mambu nionso ke salama, kaka . . .

¹⁸² Bantu yikwa vwandaka na nsatu, mpe ba lendaka kwikila kaka na ntangu yayi? Beno ke telemisa diboko ya beno, beno tuba, “Ntangu yayi mu me kuzwa.”

Ntangu yayi mu me kuzwa, ntangu yayi mu me
kuzwa,
Nyonso ke salama, ntangu yayi mu me kuzwa;
Ntangu yayi mu me kuzwa, ntangu yayi mu me
kuzwa,
Nionso ke salama, ntangu yayi mu me kuzwa
yawu.

¹⁸³ Ntangu yayi beto kulumusa bayintu ya beto na mwa ntangu fioti ntangu yayi. Landila kaka, mpangi ya kento, na piano, kana nge zola. Nge kuzwa Yandi?

¹⁸⁴ Beno ke tuba, “Mpangi Branham, mu me vwanda ya kubela ntangu mosi. Ya wandaka na kima wandaka talana mutindu ti mu zolaka nunga ve. Ba sambilaka munu, na bantu.”

¹⁸⁵ Ya kele mbote, mpangi ya bakala, mpangi ya kento, kasi nge me banzaka ntete yina ya kele? Ya kele nsilulu ya fyoti yina pesamaka na beno. “Nyonso lenda salama na yandi yina ke kwikila.”

¹⁸⁶ Beno zola ve kulosa yawu mbala mosi na Calvaire na suka yayi? Beno simba kaka nsuka ya yawu awa, Mpeve yina pesaka yawu na beno. Beno losa yawu mbala mosi na Calvaire, mpe beno tuba, “Kuna kizundu ya munu kele ya kusimba mbote. Ntangu yayi mu me kuzwa, kaka ntangu yayi. Ya me manisa, kaka ntangu yayi. Ata nyonso yina ke salama, kaka ntangu yayi kizundu ya munu kele ya kusimba na kati ya vwale, mpe mu ke kuzwa kaka yina mu ke lomba. Mu zaba ti mu ke na yawu. Ndinga ya Nzambi me tuba mutindu yina. Mpe, Nzambi, mu ke tala na Nge ntangu yayi.” Ya lendaka vwanda ti beno wandaka na manyongo, bampasi ya mbongo, nionso yina ya kele. Ata ti yina yawu kele, beno losa yawu kaka kuna na Calvaire.

Samu ti nyonso—nyonso ke salama, kwikila
kaka.

¹⁸⁷ Beno bika kaka yawu kukota, na mutindu ya mbote. Ya kele ve mbote? Yayi kele ntangu ya munu ya lukutakanu. Ba me kuna Ndinga, beno me mona, ntangu yayi Nzambi ke na kupesaka masa na Yawu. Beno lenda ve kuwa ti le- . . . yina ke lembika, lembami yina me katuka na Mvwandulu ya Nzambi, ke kulumuka kaka, samu na kumwangisila Yawu masa, beno tuba, “Ntangu yayi, awa, mwana, mu—mu me kwisa na Ndinga ya Munu. Mu ke zitisa Ndinga ya Munu. Mu ke tala Yawu mbote, kilumbu mpe mpimpa, mpe mu ke na kunwaka Yawu ntangu yayi na kati ya ntima ya beno. Nge lenda baka Munu ve mpe kukwikila Munu?”

Samu na nyonso (Yinki?) ke salama, kwikila
kaka.

¹⁸⁸ Oh! Mutindu ya kele mbote! Mutindu mbote, kaka na kukota, na kuwa maza kukulumuka na zulu ya Bankuna! Yinki ya kele? Nkuna ya kulunga, ba me kuna na kati ya ntima ya beno.

Ya kele Ndinga ya Nzambi. Ya kele Nkuna. Yina kele Mpeve-Santu. Nkuna yina Nzambi silaka na mbandukulu. Beno kele Nkuna ya Abraham, na kuvwandaka ya kufwa na Klisto, mpe me kuma Nkuna ya Abraham mpe kele bibyadi landila nsilulu. Mpeve-Santu me katuka na Nkuna ya Abraham, yina ke sala beno bana ya babakala mpe bana ya bakento ya Nzambi.

¹⁸⁹ Ntangu yayi, ya kele Mpeve-Santu yina ke na kupesaka maza na nsilulu yina beno bakaka ntama mingi ve, samu na kubeluka ya beno, samu na mpulusu ya beno, samu na kutambula ya mbote, samu na boma na kubika beno, samu na nionso yina beno kele na yawu nsatu; samu na nzietolo yina kuna na bisanga, samu na nzietolo ya bawu na yinsi ya Israel; na dibuundu ya beno, na kisika ya beno, konso kisika yina ya kele, na yinzo ya beno. Yina kele Mpeve-Santu ke tuba, “Yina kele Munu. Mu kele na beno. Kwenda na ntswala. Mu ke na kutwadisa nzila. Beno, beno landila kaka na kutambula. Ya kele Munu.”

Ya kele na Bwiki na Ditadi samu na beno;
Bika disumu ya nge samu Menga kufika,
Ya kele na Bwiki na Ditadi samu na beno.

Beto ke telama.

Oh, beno kwenda na babala-bala mpe na nzila,
Longa Ndinga . . . (Beno kele na kima beno zola
kutuba?)

Beno tuba na mpangi nyonso ya bakala yina
kubwaka,
Ya kele na Bwiki na Ditadi samu na beno.

Oh, ya kele na Bwiki na Ditadi, mpangi ya
munu ya bakala.
Ya kele na Bwiki na Ditadi samu na beno;
Bika masumu ya nge samu Menga kufika,
Ya kele na Bwiki na Ditadi samu na beno.

¹⁹⁰ Ntangu yayi, beno tala, mu zola ve ti beno kwenda ntete. Mu zola ti beno mona muntu mosi ya kutelama pene-pene ya beno, beno pesa diboko ya beno, beno tuba, “Nzambi sakumuna nge, mpangi-bakala,” to mpangi-kento, nyonso yina ya kele. Beno baluka kaka. Yayi kele mwa tabernacle yina ke yambaka bantu nionso. Beto ke na nzietelo, bantu ya mutindu yankaka. Mbote mingi.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka nsayi,
Baka Yawu bisika nionso nge ke kwenda.

Nkumbu ya ntalu, (Nkumbu ya Ntalu!) O
Nkumbu kitoko! (O Nkumbu kitoko!)
Kivuvu ya ntoto mpe kyese ya Mazulu;

Nkumbu ya ntalu, Oh Nkumbu kitoko!
Kivuvu ya ntoto mpe kyese ya Mazulu.

Ntangu yayi muntu nionso kutala na lweka yayi ntangu yayi.


Beto ke fukimina—na Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.

Nkumbu ya ntalu, (Nkumbu ya Ntalu!) O
Nkumbu kitoko! (O Nkumbu kitoko!)
Kivuvu ya ntoto mpe kyese ya Mazulu;
Nkumbu ya ntalu, (Nkumbu ya Ntalu!) Oh
Nkumbu kitoko!
Kivuvu ya ntoto mpe kyese . . . (. . . ? . . .)

¹⁹¹ Ntangu yayi na yina beto ke kulumusa bayintu ya beto na Mfumu Yesu. Ya me vwanda jubilé ya nene, mukembo ya nene, feti ya pentecote na Ndinga mpe bima ya Nzambi, na Mpeve-Santu ya Yandi. Beto zola kusambila balusakumunu ya Nzambi na zulu ya bampangi ya beto ya ba-missionaire yina ke na kwenda na bilanga ya kumwangisa nsangu ntangu yayi, mpe Nzambi na mbala mosi twadisaka bawu. Beto pesaka beno nsilulu; beto ke sambila samu na nge, mpangi-bakala, mpe mpangi-kento. Bakento ya bawu, bankundi ya bawu ya luzolo, beno banza na yina bakento yango ke na kulutilaka. Mu zaba, na nzila ya kento ya munu mosi.

¹⁹² Na ba-pasteur awa, Mpangi Jackson, mpe—mpe mu banza ti Mpangi Beeler kele kuna na manima, mpe mingi yankaka ya ba-pasteur. Teddy awa, mulongi mosi ya ntwenya. Mingi yankaka kele awa, beto ke sambila kaka balusakumunu ya Nzambi. Mpangi-bakala mosi ya ntwenia awa, yina me katuka kuna na yinzo-Nzambi ya Nzambi, yina beto ke mona na manima ya midi yayi. Beto ke sambila balusakumunu na zulu ya yandi, evangeliste, mu ke kwikila ya kele mutindu yina. Mutindu yina ve, mpangi-bakala? Yinki kele nkumbu ya nge? [Mpangi-bakala me tuba, “Morgan.”—Mu.] Mpangi Morg- . . . [“Morgan.”] Morgan, Mpangi Morgan. Mu ke kaka na kiesa na kuvwanda na bawu nionso awa!

¹⁹³ Mpe, ntangu yayi, na yina beto ke kulumusa bayintu ya beto ntangu yayi na Yandi, mpe beto ke tala. Ya kele na mwa mpangi mosi ya bakala ya kulemvuka ya kutelama na manima ya kivinga. Yandi ke benda mwa wagon mosi, mu me bakula, na yinsi ya muvimba. Mingi na kati ya bawu me zaba yandi mutindu “Profete Jean.” Beto ke bokilaka yandi “Mpangi John,” na lweka awa. Mu ke vwandaka ntangu nionso na luzitu samu na muntu yayi. Kasi, kilumbu yina mu vwandaka kuna samu na kutala bankundi ya munu, ya kele mpangi-bakala . . . Mpangi-kento Jimmy O’Neal, kuna na Sellersburg. Yina kele bokilo ya

Mpangi-bakala mpe Mpangi-kento Green. Ba kele awa na suka yayi. Mpe Mpangi Jean vwandaka na yinzo ya bawu, mpe bawu tubaka na munu wapi mutindu ya Muklisto ya kieleka yandi vwandaka. Mpe ba pesaka munu luzingu ya yandi, yina yandi tubaka na bawu, mpe mutindu yandi lutaka na kumekama ya ngolo. Mpe yandi kele na nzila ya mpasi. Mpe beto ke lomba yandi, na suka yayi, kana yandi ke manisa kuvunaka yayi, mpe ke lomba lusakumunu ya yandi na Nzambi, na zulu ya dibuundu yayi. Nge zola kusala yawu samu na beto, Mpangi Johnny? Na yina beno nyonso kukulumusa bayintu ya beto. Mpe, Mpangi John, kana nge zola kusala kisambu ya kumanisa. 

JOSEPH ME KUTANA NA BAMPANGI YA YANDI KNG56-1230

(Joseph Meeting His Brethren)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 30 ya Ngonda ya kumi na zole, na mvula 1956, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org